

## **Paurongo Roma Kpebung Yeneac Kibi Ohoec**

<sup>1</sup> Ni Paurongo kibi yoc ohoma Roma kpebung ngenearu faiduae. Yesu Kristo ye minginna nga ni yeac wanacngic. Yeng kpacnuma segerenuu aposoro ua mema Anutuac siduc gombung dekperagibadeac denenec. <sup>2</sup> Yeng siduc gombung imocnoc warac profete yenearu yoac dedzege amma haudeac deu yeneng imoc mitikibi kpetiacfu ohogec fede. <sup>3</sup> Siduc imoc yofi, Anutuac Medac, Kebunina Yesu Kristo, yeng ngicsebiac arennu Dawidiac fingecsaheunac fingerec amma <sup>4</sup>kpetiac Asungo kucgoc yombong yeac yofi dekperagiec, yennoc homecfunac gborima yarec, imocngo yofi edzacnunude, ye Anutuac Medacyombonga. Imoc Kebunina Yesu Kristoac siduc gombung. <sup>5</sup> Anutungo deu ye wosoefac anemmema aposoro ua nemmeu neni yeac kpacac amma bangec monnunac ngicngac Anutu mi negemmidae, yeneac botucfu yoac dekperagini yeneng ye negensingema yoara tofohogecde, ua imoc mekecdimbe. <sup>6</sup> Nga Anutungo ngeni ifingoc kpacngunuma Yesu Kristoac areng anggecdeac negende.

<sup>7</sup> Anutuac songoareng Roma taonnu kecdae, ngeni kpacngunuu yeac kpetiac areng kecdae. Nga Anutu Manninaac amma Kebu Yesu Kristoac danggunuc nga ruaengo ngenearu febeso.

<sup>8</sup> Bangeha bangeha yeneng ngeneac negen negensingninaac yoaciduc edeemeandae, imoc wiac engena ifi negemma ngeneac negensima Yesu Kristoac kpacfu Anutuna dangge edekecd-uae. <sup>9-10</sup> Ni numuanduae, imohai nasosoc ngeneac negensima numukecduae. Anutungo imoc hemma hepucna ande. Nga ongaasunango uaya mekecma yengena Medahaac siduc gombang dekperagianduae. Amma ni nasosoc Anutu numumiba yeng negenu naric anu ngenearu bic habade.

<sup>11</sup> Hama ngenemba nenahafoc kecma ngeni serigecdeac Tiri Asuac wosoefacac kuc ngenearu mederebade, imocac homac anende. <sup>12</sup> Ni yofi negemma imoc deduae, ni ngenearu haba nenang negen negensinninango nangeemema ngeneng ni meserinugec neng ngeni meseringunubade. <sup>13</sup> Negen negensinggoc tosofocna, yofi negenggecdeac anende. Ni miti uaac fora imoc bangec monnunac ngicngac Anutu mi negemmidae, yeneac botucfu kpedzucneanduae, ifi isocngoc ngenearu hama miti uaac fora goa kpedzucnebade. Amma imocac naso homac arenga faikecbare wiac goango ine dzegenukefec.

<sup>14</sup> Ni grikgic nga bangec monnunac ngicngac Anutu mi negemmidae amma fakangina siriha kpac kecandae, yeni miti dekperagiyemmebesare. Amma ngic negen negenggoc nga negen negengina kpac, yenearu siduc gombang mamangkima dekperagima imocngo turunna kpoubesare. <sup>15</sup> Imocac amma Roma taonnu ngicngac kecdae, ngenearu

ifingoc siduc gombang dekperagibadeac herena yacande.

<sup>16</sup> Siduc gombang imoc Anutuac kuc. Imocngo ngicngac sasawa negensinggeandae, yeni kopocsicac ebicfunac mesiyunuu komoc kpegecde. Yoac imoc yuda yeneac arennu waraima kemma grik yeneac arennu momoc kenec. Imocac amma ni siduc gombangac negemba gameagoc mi angkecde. <sup>17</sup> Anutungo ngicngac dindingac denemmeande, imocac siduc gombunnu yofi fingectegecande, negen negensinggoc hanahema negen negensinggoc mesibesonga. Amma yoac yofi bic oho ohoya fede,

“Ngic dindingac ye negen negensinggoc kecma kechereude.” *(Habakuc 2:4)*

<sup>18</sup> Ngicngac goa yeni Anutuac faka nga yoac ngadehema sing ferahaandae amma faka nga yoac fora kpema waandae. Ngicngac imoc yeneac turunga kurumenunac fingeru Anutungo imoc kpouyemmeude. <sup>19</sup> Anutu haniaya botucnginau dindingac hengkecdae. Imocnoc Anutu yengenaoc mekperagiyemmeande. <sup>20</sup> Amma hanahema ama bangec meficgeecfunac kecerema yofinenggac kecdimbengoc yengena kicngo mi hengena nga yeng wiac meficgeec, imoc henggec. Imocngo yengena marikibiaac siriha fingecyemmeu negentegeckecdae. Yeng nasoya nasoya kuc mingina kefecngo kefude amma ye Anutu, yeni imoc hentegecma kecdae. Imocac mongngo yoac mong yofi naric mi deude, “Anutu kecde, imoc mong mi negentegeraiac kopocsicna wabeso.”

<sup>21</sup> Yeni Anutu negemmidae, amma ewehihei ine mi ammigece. Nga ye Anutu, imoc negendaenoc nga yeni ine ye mi dengeregece. Yeni ine negen negengngina ikoha, imocngo faka meu kicpisc nga ubafong anggec kundungngo ubanegen negengngina semeu sing segegece. <sup>22</sup> Yeni ifi kecma deandae, “Neni negen negentegecgoc.” ifi dema samackpeng amma dzingfonga kecandae.

<sup>23</sup> Nga yeni Anutu homeha kpac, yeac kuc kibikperagiagoc wama ngic homemea, yeneac ongangina nga neng nga yamberec amma sekac ongangina goa imocac Anutu siriha, ifia dema mekegece. <sup>24</sup> Ifi angandaeac amma Anutungo yenang hereyacyac fakanginau wayunuu yeni kaiserofaka angkecma sebingina faka gameagocfu kpeandae.

<sup>25</sup> Anutungo wiac sasawa deu fingerec, yearu dedengerec nga dedengerec fekengkecbeso, imoc fora. Nga yeni ine Anutuac yoac fora wama ikocyoac hoanggegece. Nga ye wiac sasawa deu fingerec, yeac ewehihei faka wama yeac bageu monggoc mi kecandae. Yeng deu wiac fingerec, yeni imoc afehema imocac kingang kpeandae. <sup>26</sup> Imocac amma Anutungo kpae mong mi heiyememema wayunuu hereyacyac faka gameagocngo fenggeyunuu ngac yeni ngicgoc kecandae negengandimbe, yeni sing imoc wagec faka goa ngacngo faka mi angana, imoc angemekecdae. <sup>27</sup> Nga ngic yeni sing imohaingoc ngacgoc kekec kecandae negendimbe, imoc wama herengina gerec isoc borang tiu ngicngo ngicfu kemma faka gameagoc angemeandae. Ngicngac ifi angkecdae, yeni

yenaocngoc fakangina gameagoc anggec, imocacsoc turungango kekecnginau faka dindingac modacma meficgeyemmeude.

<sup>28</sup> Ngicngac yeni Anutu negemmibesonga negenggec wiac mamea anu faka imoc ngadehema wagec. Imocac amma Anutungo ifingoc kpae mi heima wayunuec. Wayunuu yeni faka kpedahango fenggeyunuu faka ngicngo mi angana, yeni imoc modacma angemekecgec.

<sup>29</sup> Nga yeneac hereu faka mangana hania hania wake wakea fede, imoc yofi, yeni ngicngac dindingac kpac. Yeni ngabagoc nga kichodunggoc kecma faka mangana amma keracmanganggoc kecandae. Yeni herengina yaru ngic yunukpebuc anggecdeac ayemmeu ngabau eweandae. Yeni ikoc nga ngaba arennu ngic memanganeyunugecdeac ayemmeande amma gubekisang kecandae.

<sup>30</sup> Kecma yeni enacfu faifai amma Anutu ubango wama ubaseri kecma yoacngina goriamma sebiengeng faka angkecdae. Amma nonggo mangfocngina yeneac yoac kpema faka mangana gboriamme ficgeandae.

<sup>31</sup> Nga yeni negen negengngina kpac kecma yenang yoacngina kpeandae. Yeni ngicngac tosofocngina heresongogoc hoangyunugecdeac obohoma ngicngac yeneac ubamangang mong naric mi negenggecde.

<sup>32</sup> Ngicngac faka mangana ifiamma angandae, yeni homecac areng andae. Yeni Anutuac sing dindingac imoc negemmaguc sifu faka ifiamma angkecdae. Nga yeni imocgoc torokpema goa yenenggec faka mangana ifiamma kecgec, imoc ifingoc ne-

genggec ngereeeande.

## 2

<sup>1</sup> Imocac ngic me ngac, ge negenna, ge ngicngac goa yeneac fakangina isinggema kopocsicnginagoc andae, ifi dekecnade, naso imohai geangga yeni isocngoc kopocsicgagoc annec, imoc deficemenade. Nga yeni isingyunuma, “Ngeni kopocsicnginagoc.” ifi deannecac geangga ifingoc isingemenec ande. Nocac geac faka nga angammemega imoc yeneac isocngoc ande. <sup>2</sup> Anu faka nga angammemengina ifia angkecdae, yeni Anutungo sing forau isingyunuma kopocsicnginaac turunga yemmeude, imoc negendimbe. <sup>3</sup> Nga ngicngac goa faka ifia angkecdae, ge yeneac faka isinggema kopocsicnginagoc andae dema geangga faka ifiangoc angkecma Anutuac isic isinggenasou degbedic yoc goa dema woranadeac negennec nga imoc kpac yombong. <sup>4</sup> Anutungo faka yumea yombong anggemma modzotitia kpac tomaiga naso herea kecande, imoc ngadehenadeu naric mi ande. Nga ubaga merennadeac Anutungo yumea anggende, ge sifu imoc negentegecbesena. <sup>5</sup> Nga here dzege dzegegoc kecma ubaga mi meremma kopocsic mekpedzuc angkecma turunga menade. Nga Anutuac turung kpoukpouac nasotoa hau turunga dindingac fingectegecgenude. <sup>6</sup> Imoc yofiac,

“Kebungo ngicngac tembuc tembuc angammemengina hennegeng amma turunga kpouyemmeude.” (*Mitiyegec 62:12; Yoac negen negengagoc 24:12*)

7 Mong ye mamangkima faka gombunga mekecma kurumenggac kuc kibikperagiagoc nga ewehihei amma kekecseri meudeac ammiu uatoa mekecde, Anutungo ye kekec wisic wisickea kpac miude. 8 Nga mong ye yengenaacsac negemma kecma yoc forami tofohoande nga sing dindingac kpema mangana modacande, Anutungo yearu herebuya kpakema kopocsicac turunga miude. 9 Nga ngicngac angammeme mangana angkecdae, yeni sasawango kpendzeng nga ubaebictoa meficgegecde. Yuda arengngo imoc waraima meficgemagec grik areng yeneng momoc meficgegecde. 10 Ngicngac faka nga angammeme gombunga angkecdae, yeni sasawango kurumenggac kuc nga kibikperagia nga ewehihei amma ruae meficgegecde. Yuda arengngo imoc waraima meficgemagec grik areng yeneng ifingoc meficgegecde.

11 Anutu ye monde mondea mi femide. 12 Ngicngac dedeseriyoac yenearu mi faifaia, yeni kopocsic meficgegec Anutungo dedeseriyoara kpac, yeni sasawa manganaac areng desiyunuma wayunuude. Nga ngicngac dedeseriyoacac bageau kecma kopocsic meficgegec, yeni dedeseriyoacngo yoacfu faiyunudaru kopocsicnginagoc kecma manganedacgecde. 13 Nga ngicngac faka nga angammenginango dedeseriyoac modackecdae, Anutungo yenemma dindingac deyemmeude. Nga ngicngac dedeseriyoac kedzacngosac negengandae, yeni dindingac mi deyemmeude, kpac.

14 Anu bangec monnunac ngicngac Anutu mi

negemmidae, yeni dedeseriyoac oho ohoya mi modacandaengo yoara sifu momorongnginau fede, yeni imoc tofohoma dedeseriyoac modacandae, yeni yenaoc dedeseriyoacac mingina anggecde. <sup>15</sup> Nga dedeseriyoacngo wiac ambesonga dede, imoc ngicngac ubanginau bic oho ohoya fede, imoc edzacnunuandae. Amma here negen negengngina imocngo meseriude. Ubangina nga here negen negengngina yeri yerahafoc ua mema yoacfu kopocsingngina deficgeandape me nanggeyunuma meficyunuandape. <sup>16</sup> Imoc Anutuac desi desi nasotoau fingectegeru henggecde. Ni siduc gombung Yesu Kristongo nenec, imoc yofi dekperagianduae, Anutungo nasotoau ngicngac yeneac negen negeng sufufufuya feec nga fede, imoc isinggema desiude.

<sup>17</sup> Yudangic ngeni ngenanggac deandae, “Ni yudangic dema dedeseriyoacngo nanggenuu kecduae.” Amma ge Anutu negennec imocac negenna engena angkecde. <sup>18</sup> Anu dedeseriyoacngo sing kpougenu ge Anutuac negen negeng nga songo bic negemma faka nga angammeme damoc gombunga, imoc isinggema naric ireckenade. <sup>19</sup> Nga yofi negengemeannec, “Ngicngac kicpisis yeneac sing edzacyunuyunu ngic amma kundung manau kengkecdae, yeneac kperagia, imoc ni.” <sup>20</sup> Nga dedeseriyoacfu negen negeng nga yoac fora hafoangoc fedecac ge negen negengngina obohoandae, yeneac negennec, “Ni yeneac dederecngenic.” amma ngicngac nambaracuba mekecdae, yeneac yofi negengannec “Ni yeneac

kpoukpou.”

<sup>21</sup> Ge ifi amma goa edekpou ayemmema geangga ine mi kpouemeanec. Amma hamangec mi mebesonga, ifi edeyunuma geangga sifu wiac hamangec meanec. <sup>22</sup> Amma kaiserofaka mi ambesonga, ifi demaguc geangga kaisero angannec. Nga ge nemu ngadeyunuannec amma geanggaoc ine womonginau emma yeneac wiac hamangec meanec. <sup>23</sup> Amma Anutuac dedeseriyoac mekecma geanggaac negenna engena anu gennoc dedeseriyoac kpema Anutu game witiau faiannec. <sup>24</sup> Mitikibiu yoac yofi oho ohoya fede,

“Ngeni ifi angkecdaeac amma bangec monnunac ngicngac, yeneac botucfu Anutuac kpac denggbaringgegecde.” *(Yesaia 52:5; Edzekie 36:22)*

<sup>25</sup> Ge sebi tosaga herecgema dedeseriyoac modacnadeu imocngo memefihagoc anude. Nga dedeseriyoac kpenadeu ine sebi tosaga herec herecgeango sifu sebi herec herecgea areng mi annade. <sup>26</sup> Anu areng goa sebi tosingina mi herecgegec, yeni angammemenginango dedeseriyoac modacdacande, yeni sebi herec herecgeareng, kpacngina ifi naric kpacbesonga. <sup>27</sup> Nga ge sebi tosaga herec herecgeango kecma dedeseriyoacac kibi mekecma dedeseriyoac ine kpema kecna ngic mong ye sebi tosea mi herecgegec, yeng dedeseriyoac modackecma faka nga angammemega isinggema ge kopocsicgaggoc deude. <sup>28</sup> Ngic mong ye sebiugeng yudangic ande, ye yudangic fora mi ande, kpac. Nga

ngicsebiu sebi tosea herecgeandae, imoc sebi herec herecge fora mi ande, kpac. <sup>29</sup> Mong ye ubahereau yudangic ande, yeng yudangic yombong. Anutuac Asungo ubahereaac herec herecge ua meu Anutungo ngicngac areng ifia dengereyunuande, imoc ngicac ua kpahac. Nga dedeseriatic kibingo ubahereac herec herecge ua, imoc naric mi meude.

### 3

<sup>1</sup> Yudangic yeneng sebi tosingina herec herecgea kecmagec faka imocngo yofi meficyunuu areng goa taticngina feracyunugecde.

<sup>2</sup> Anutungo yudangic kekecnginau hafoangoc nanggeyunuma ngic areng goa feracyunuma yudangic faka gombunga homac yombong ayemmeude. Yeng yeneac negenu ngereeu yengena yoac garengegecdeac yeneac botucfu faiec fede, imoc negenggec engena ambeso.

<sup>3</sup> Anutungo yoac dedea modackecde. Anu goa yeni negen negensingngina kpac kecgec, fakangina imocngo Anutuac faka mi meickeec.

<sup>4</sup> Imoc kpac yombong. Yoac yofi oho ohoya fede, “Geng yoac denec, imoc fora fingectegerude nga ge ngic hania isinggema yoacngina desinec, imoc dindingac.” *(Mitiyegec 51:4)*

Yoac yofi deni seria febeso, “Anutu ye fora nga ngicngac sasawa nenang ine ikocninagoc.”

<sup>5</sup> Goa yeni deandae, “Ngicngac angam-memenina manganangonoc Anutuac faka dindingac mekperagiude.” Yoac imoc fora mi ande nga fora ambac dede Anutungo mangananinaac turunga kpounemmeu,

imocngo dindingac naric mi ambac. Ni ngicac negen negeng modacma yoacna ifi deduae. <sup>6</sup> Anutu ye fakaya dindingac mi ambac debac bangeha bangehaac ngicngac naric mi isingyunuma desiyunubac, imoc foracngoc. <sup>7</sup> Neac ikocyocngoc Anutuac yoac fora mekperagima kpara dengerebac ye kopocsicngic naric mi denembac. <sup>8</sup> Goa yeni enacfu faifai anemmema deandae, “Wiac gombunga fingerudeac nenang angammeme goa mangana ambisina.” Nga goa yeneng neneac deandae, “Imocnoc kpounemmeandae.” Ngicngac yoac ifia deandae, yeni Anutungo kopocsicnginaac turunga, imocac sirihau yemmeude.

<sup>9</sup> Imocac dafi denide, yudangic nenaoc grikgic feracyunukecdimbe me? Imoc kpac. Yudangic nga grikgic yeneac yoacngina yofi bic deding, “Nenang momoc sasawango kopocsicac bageau kecdimbe.” <sup>10</sup> Imocac yofi oho ohoya fede,

“Ngic mongngonec dindingac mi kecde, imoc kpac yombong. <sup>11</sup> Amma ngic mong negen negentegecgoc mi kecde me mongngo Anutu hofoc hofoc ua mong mi mekecde, kpac. <sup>12</sup> Yeni sasawango Anutuac sing ngadehedacma yenahafoc manganegec, mongngonec angammeme gombunga mi angkecde, imoc kpac yombong.” (*Mitiyegec 14:1-3; 53:1-3; Miti dedengic 7:20*)

<sup>13</sup> “Yeni ubangina imoc kicsere angge angge.” (*Mitiyegec 5:9*)

“Yeni nedzarangnginango ikoc ayemmeandae amma bibicnginau boidzocac marasing

mekecdae.” *(Mitiyegec 140:3)*

14 “Yeni enacnginau sowecyoac nga negem-mangang herenginaunac gerec dzema ereande.” *(Mitiyegec 10:7)*

15 Nga yeni ngicngac yunuma sacngina hetinggegecdeac haninginango kpouma bic kengkecdae. 16 Amma yeni sing kengkecdae, imohai amabangec memanganema ngicngac ebicfu faiyunuandae.

17 “Ngicngac imoc yeni ruaegoc kekecac sing mi negendae, kpac.” *(Yesaia 59:7-8)*

18 Amma yeni Anutuac kicfu dzonong fede fedegoc namma eweheimigecdeac mong mi negensiandae. *(Mitiyegec 36:1)*

19 Neni yofi negendimbe, dedeseriyoac imocngo ngicngac dedeseriyoacac bageau kecdae, imoc yeneac enacngina medzickeudeac nga bangeha bangeha ngicngac sasawa yeni Anutuarunac turunga megecdeac amma yoara dede.

20 Ngic mong ye dedeseriyoac modackecma Anutuaru haude, ye Anutungo yofi naric mi demide, “Ngic imoc ye dindingac.” Dedeseriyoac imoc ine kopocsicnina dekperaginemmeu negennide.

21 Anu yofinenggac Anutungo ngicngac dindingac denemmeande, ye imoc didiu faiu hengkecdimbe. Sing imoc dedeseriyoac nga profete yeni hepuc angandae nga imoc dedeseriyoacac sing mi ande, kpac. Imoc sing gboria amma siriha mong yombong. 22 Anutungo Yesu Kristo fainemmeec nga ngicngac ye negensinggedae, yeneac dindingac deyemmeude. Nga ngicngac sasawa nenang siricnina mong

mong mi ande, <sup>23</sup> nenang sasawa kopocsic meficgema kuc nga kibikperagia Anutuarunac haande, imoc kekecninau obohoma kecdimbe. <sup>24</sup> Obohomina Yesu Kristongo witicfunac yungecnunuec. Yungecnunuma Anutungo wosoefac anemmeandeac amma dindingac denemmeude. Imoc finge cnemmeudeac nenaoc ua mong mi meing.

<sup>25</sup> Anutungo Yesuac sac hensima nonongkac faiu nanu ngicngac nenang Yesu negensinggenide, yeng kopocsicac turung kpou kpouac bung angkecde. Sing imohai Anutu ye yengena dindingac, imoc edzacnunuudeac negenu ngereec. Imoc yofiac, ye warac ngicngac faka yumea ayemmema kopocsicnginaac turunga bic mi kpouyemmema <sup>26</sup> naso herea modzotitia kpac tomaingina kefec. Ye naso yofinenggac ngicngac Yesu negensinggekecdimbe, nenang dindingac denemmeude. Ye yengena dindingac, imoc edzacnunuudeac negensima Yesuac uaac amma dindingac denemmeude.

<sup>27-28</sup> Ifiac amma angammemenina gombunga imocac sebinina meennideac sing mong mi fede, kpac. Anutungo ngicngac dindingac deyemmeande, imoc negen negensingnginaac amma deude, neni imoc negemma meseridimbe. Yeni dedeseriyoac modackecdaeac ye dindingac mi deyemmeude, kpac. Imocac negen negensinggac amma sebiengeng naric mi annide. Ge uagaac amma ngic dindingac naric mi annade, imocac sebiga naric mi meennade. <sup>29</sup> Goa yeni yofi deandaec, Anutu ye Yuda yeneac Anutusac. Nga imoc fora kpac, ye bangec monnunac ngicngac, yeneac

Anutu momoc kecede, imoc fora. <sup>30</sup> Anutu mocgun-gonoc kecede. Amma ye sebi tosangina herecgegec, yeni negen negensingnginaac amma dindingac deyemmeude. Nga sebingina mi herecgegec, yeni ifingoc negen negensingngina hemma dindingac deyemmeude. <sup>31</sup> Nga negen negensinninango dedeseriyoac mi meickenide, kpac. Nenang negen negensingngo dedeseriyoac nanggenide.

## 4

<sup>1</sup> Kisicnina Abrahang yeac hania henni. <sup>2</sup> Goa yeni yeac deandae, “Anutungo angammemeaac amma yeac ngic dindingac demiec.” Imoc fora mi ande nga imoc fora ambacfu ye sebia naric meembac. Nga imoc ine Anutuac kicfu kpac.

<sup>3</sup> Neni mitikibiu yofi osoandimbe,  
“Abrahang ye Anutu negensinggeecac amma,  
yeng yeac ngic dindingac demiec.” (*Fingec  
fingec 15:6*)

<sup>4</sup> Ngic mong ua meande, yeac uabung imoc wosoe-facac mimia mi ande, imoc ua meecac turunga ande. <sup>5</sup> Nga mong ye uaac sing wama negenser-ima Anutu negensinggeude, yeac yofi fingerude, Anutungo ngic mangana dindingac deyemme-ande, yeng ngic imoc negen negensingaac amma uaya kpac wosoe-facfu ngic dindingac demiude.

<sup>6</sup> Nga mong ye angammeme gombunga mong mi ammanu Anutungo yeac dindingac deu yeac kenec meude, ngic ifia yeneac Dawidingo ifingoc yofi deec,

<sup>7</sup> “Ngcngac goa yeni singyoac kpema kecmagec Anutungo manganangina wayemmeec nga

kopocsicngina semeyemmeec, yeni kenec-  
 nginagoc. <sup>8</sup> Nga KEBUNGO ngic monggac  
 kopocsihaac kpete mi meude, ngic imoc ye  
 kenehagoc.” *(Mitiyegec 32:1-2)*

<sup>9</sup> Kenec yoac, imoc ngic sebi tosangina  
 herecgegec nga ngic mi herecgegec yeneac  
 momoc dedea. Abrahango negensinggeecac  
 Anutungo yeac negemma ngic dindingac demiec,  
 ifinoc negemma deandimbe. <sup>10</sup> Abrahang ye  
 sebi tosea herecgeuguc Anutungo dindingac  
 demiec me? Imoc kpac, ye sebi tosea mi  
 herecgemanungoc Anutungo ye dindingac  
 demiec. <sup>11</sup> Abrahang ye negensinggeu Anutungo  
 yofi demiec, “Ngic imoc dindingac.” ifi dema  
 sebi tosea herec herecgeac ma Abrahang miec.  
 Ye sebia mi herecgema bic negensinggeec.  
 Nga ngic sasawa sebingina mi herecgema  
 negensinggeandae, Anutungo yeneac dindingac  
 deudeac yeni Abrahanggac kisicfora, ifi  
 kpacyunuec. <sup>12</sup> Nga ngic sebi tosangina  
 herecgema Abrahanggac hanititi modacma  
 Kebu negensinggeandae, yeneac ifingoc yofi  
 deec, Abrahang ye yeneac kisicngina. Negen  
 negensinnu kisicngina Abrahang, ye hanahema  
 sebi tosea mi herecgema bic negensinggeec, ye  
 isoc andae.

<sup>13</sup> Anutungo Abrahang nga bangecfora  
 yenigoc yoac yofi dedzege anec, bangec  
 nga kurumeng imoc ngeneac maridzoming  
 anudeac ngemmede. Nga imoc Abrahango  
 dedeseriyoac modarecac mi deec, kpac. Yeni  
 negensinggegec nga Anutungo negengyemmema  
 dindingac deyemmeec, imocac witiau yoac

dedzege anec. <sup>14</sup> Nga ngicngac yeni dedeseriyoac hoanggema maridzomingngina mebau dede negen negensinggoc kekec foraya kpac ambac. Nga Anutungo wiac yemmeudeac deseriec, imoc ifingoc kuha kpac ambac. <sup>15</sup> Dedeseriyoacngo kopocsicac turunga heficgeude nga dedeseriyoac mong mi feudeu dedeseriyoac ifingoc mi kpebau.

<sup>16</sup> Abrahang ye ngicngac dedeseriyoac mekec-dae, yeneac mangngina. Amma ye ngicngac negen negensing yeac isoc feyemme, ye ngic ifia, yeneac manggac. Nga Abrahanggac bangecfora sasawa yeni dedzegeac yoac naric megecdeac imoc wosoefacac bageau feu negen negensingnginaac amma megecde. <sup>17</sup> Nga Abrahanggac negensima yofi oho ohoya fede,

“Ni faiguba ge ngicngac areng homac yeneac mangngina annade.” (*Fingec fingec 17:5*)  
 Nga Anutungo ngic homemea megboriyunuande nga wiac mong mi fede, imoc bic fede, ifi isoc ye imoc dema kpara kparu fingeande.

Ifiac amma Abrahang ye nenang mannina, imoc Anutuac kicfu nga negen negensinggac sinnu. <sup>18</sup> Yeng gboricgoc anudeac siriha mi kefec, kpac. Nga ye Anutu negensinggeecac ngicngac areng homac yeneac kiscngina anec. Imocacnoc yoac yofi bic dedea feec,

“Bangecfocga yeni homac yombong, kpete imocacsoc fingegecde.” (*Fingec fingec 15:5*)

\*

<sup>19</sup> Abrahang ye kifaya 100 isoc anu sebia dza-parema kpedziu negenec. Nga enema Sara ye kifa

---

\* **4:18:** Asomenggac kpete imocacsoc fingegecde.

feraheu sabac meudeac siriha naric mi anec. Nga Abrahang ye negen negensinga sifu seria feecac kucmama mong mi anec. <sup>20</sup> Ye Anutungo wiac miudeac deseriec, imocac negengyohoc mong mi amma serima negensinggema kecma Anutu afehekefec. <sup>21</sup> Nga Anutungo yoac deserimiecmoc imoc meudeac imocac kuha soha femiec, Abrahango ifi negentegecma negenseriec. <sup>22</sup> Imocac amma yofi nande, “Anutungo yeac negensima, ngic dindingac demiec.”

<sup>23</sup> Nga yoac yomoc, “Yeaac negensima ngic dindingac demiec.” imoc Abrahanggacsac negemma mi oho ohoya fede, kpac. <sup>24</sup> Imoc nenanggac momoc oho ohoya fede. Anutungo Kebunina Yesu homecac arenunac megboriu nenang ua imoc meec, ye negensinggeni yeng ifingoc negennemema dindingac denemmeude. <sup>25</sup> Nga nenang sing feraheing, imocac amma ngicngac yeneng Yesu homecfu faigec. Nga Anutungo dindingac denemmeudeac Yesu homecfunac monggoc megboriu yarec.

## 5

<sup>1</sup> Ifi amma Anutungo negen negensinnina hemma dindingac denemmeu Kebunina Yesu Kristoac amma yegoc ruaeu kecdimbe. <sup>2</sup> Yeng sing mefiggenemmeu Anutuac danggunuc manau yofinenggac kecdimbe. Nga Anutuac kuc kibikperagiagoc ngade fingeenemmeude, imoc wiac engena, ifi negemma sogaima kecdimbe. <sup>3</sup> Amma imocsac kpac, nenang ifingoc kpendzeng witiau kecma imocac negenni engena anu sogaikecdimbe. Kpendzeng kpekpe, imocngo

herenina meseriude. <sup>4</sup> Meseriu modzotitia kpac kecma seserigoc nannide nga eucererenggac fora fingerudeac negensingema kecdimbe. <sup>5</sup> Ifi kecmina ubaninaac kuha naric mi maude. Nocac Tiri Asugoc anni Anutungo songoya ubahereninau kpakeec fede.

<sup>6</sup> Nenang sicsauc kecminangoc Kristoac naso hau yeng nenanggac tatac mema homeec. Makpekpea kecminangoc, ye ifi anemmeec. <sup>7</sup> Ngic mongngo ngic dindingacac amma homeudeac negenside, siduc ifia mi negengandimbe. Nga mong ye faka nga angammemea gombunga angkecde, mongngo yeac amma kengec wama homecfu naric kembac gedang. <sup>8</sup> Anutungo songoya edzacnunuma Kristoac deu yeng ngicngac nenang kopocsigoc kecmina nenanggac ammanoc homeec. <sup>9</sup> Anu yeac sawaac amma Anutungo ngicngac dindingac denemmeu yofinenggac kecdimbe. Imocac ye ifingoc turung kpoukpouac nasou yoacnina deu komoc kpebesandimbe, imoc negenserima kecdimbe. <sup>10</sup> Nga nenang Anutuac ngabafora kecmina Medahaac homecngo ngaba meickeu Anutugoc ruae fingeenemmeec. Ruae fingeenemmeu nenang ifingoc Medahaac kekecac amma komoc kpebesandimbe, imocnoc negenserima kecdimbe. <sup>11</sup> Amma imocsac kpac, Kebunina Yesu Kristongo kopocsicnina meickema Anutugoc ruae meficgenemmeu nenang yofinenggac Anutuac negenni wiac engena anu sogaima kecdimbe.

<sup>12</sup> Imoc yofi fingerec, ngic mocguacsac amma kopocsic bangectoa bangecfu fingeema homec heficgeec. Nga ngicngac sasawa kopocsic

meficgegecac amma homecngo ngicngac sasawa meyunuec. <sup>13</sup> Dedeseriyoac bangectoa bangecfu mi femanu kopocsicngo bic haec. Dedeseriyoac mong mi feu kopocsicac hennegeng naric mi fingerude. <sup>14</sup> Nga Adanggarunac erekecma Moseac nasou homecngo ine ngicngacareng sasawa garengyunuec. Adangngo kopocsic meficgema Anutuac yoac kpeec. Nga goa yeni yeac kopocsic imoc isoc mi meficgegec nga homecngo yeni sifu meyunuec. Adang ye ngic haudeac dedea, yeac ongea.

<sup>15</sup> Sing ferac ferahea, imoc siriha mong ande nga danggunuc imoc siriha mong, imoc fora. Ngic mocgungo kopocsicfu makpeecac ngicngac ebiriango homedagec. Nga Anutungo wosoefahaac nga ubangerehaac wiac ngicngac yemmeande, imoc ine homactoa anu yenearu ebiria yombong kpakeyemmec. Imoc ngic mocguacsac, Yesu Kristoac wosoefacac amma ifi fingecma feec. <sup>16</sup> Ngic mocgungo hanahema kopocsic meficgeec, Anutungo imocac amma wosoefahaac wiac yemmeande, ifi mi negembisina, kpac. Ngic mocgungo kopocsic hanahema meficgeu Anutungo turung kpoukpouac faka hanahema meec. Meu ngicngac homac yeneng ine sing ferahema turungnginagoc anggec. Anggec Anutungo ifi hemma wosoefac ayemmema kopocsicnginaac turunga waec.

<sup>17</sup> Ngic mocgungo hanahema sing feraheu yeac kopocsicac amma homecngo ngicngac garengyunuudeu ine yofi negembisia, Anutungo ngicngacareng danggunuctoa ayemmema wosoefacfu didingac deyemmeu, yeni ngic

mocgu, Yesu Kristo, yegoc kecima kekecac arennu kecima wiac homac yenhafoc garenggegede.

<sup>18</sup> Ifi anu ngic mocgungo sing feraheecac Anutungo ngicngac sasawa manganaac arennu desiec. Nga ngic mocgungo angammeme dindingac anecac ifi isocngoc ngicngac sasawa kopocsicnginaac turunga meickeec. Meickeu Anutungo ngicngac dindingac deymmedaru imocngo kekeseri heficge yemmeec. <sup>19</sup> Nga ngic mocgungo enac tofoc tofoho faka wau ngicngac ebiriangoc yeni kopocsicnginagoc andacgec. Nga ifi isocngoc ngic mocgungo enac tofoc tofoha anecac amma Anutungo ngicngac ebiriangoc yeneac dindingac deymmeec nga deymmeude.

<sup>20</sup> Anu kopocsicngina kuneng monggoc anudeac dedeseriyoac haec. Nga kopocsicngina kuneng yombong anu danggunucngo monggoc yombong kopocsicngina ferahema fingeema fec.

<sup>21</sup> Imoc yofiac, kopocsicngo homec meficgema yenenggareng anec, ifi isocngoc danggunucngo garennina anu Anutungo Kebunina Yesu Kristoac amma dindingac denemmema kekec wisic wisickea kpac nemmebesande.

## 6

<sup>1</sup> Imocac yofi debisina. Anutuac wosoefacngo yadiudeac nenang kopocsicfu monggoc torokpema mi kecbisina, kpac. <sup>2</sup> Nga kopocsicfunac bic homeing, ifi negemmaguc sifu ihai monggoc torokpema mi kecbisina. <sup>3</sup> Nenang Yesu Kristoaru kpeketahama kecnideac doku nadzicnemmegec. Amma sasawango homehau bariyuhung anemmeu nadzicdaring, ngeni imoc

mi obohodaē. <sup>4</sup> Nga doku nadzicni Anutungo yegoc tonggonunuu homecfu kemeing. Manggac ye kuc nga kibikperagitoayango Yesu homecfunac megboriu kekec gboriau enec. Enu nenang ifingoc kekec gboriau kecnideac yegoc torokpenunuec.

<sup>5</sup> Yesungo homeec, imocac siricfu yegoc torokpema homeing. Amma ye homecfunac gborima yarec, nenang ifingoc torokpeinggac gborima yacnide imoc negendimbe. <sup>6</sup> Kopocsicac kuc heresebininau ua mekecde, imoc kpac anudeac ubaherenina esea mariponnu Yesugoc kpekpea, imoc negendimbe. Kopocsicngo minginnina monggoc mi kefudeac ifi anec. <sup>7</sup> Imoc yofiac, Yesungo ngic homeec, ye kopocsihaac witicfunac bic mesiec.

<sup>8</sup> Nga nenang Kristogoc bic homeing dema yegoc ifingoc kecnide, imoc negensinggedimbe.

<sup>9</sup> Nga Anutungo Kristo homecfunac megboriu yarec. Amma ye yacma monggoc mi homeude, imocnoc negendimbe. Ye homecac kuc bageau monggoc mi kecde. <sup>10</sup> Ye ngicngac kopocsicninaac amma atac mocgusac homeu wisickeec. Amma yofinenggac kecde, imoc Anutuac hoannu kecde.

<sup>11</sup> Imocac ngeni ngenanggac yofi negembisia, kopocsicfunac bic homema imocac bageau monggoc mi kecdimbe. Nenang yofinenggac Yesu Kristogoc kpeketahema Anutuac hoannu kecdimbe.

<sup>12</sup> Kopocsicngo kpedzingunuu sebiac negensongo hania haniango wangepngunubacac ngeni kopocsic faka uba eseau fekecde, imoc wama mi modacbisia. <sup>13</sup> Amma oruc kickedzac nga hanimaringina imocngo kopocsicac kingangkpekpe mi ambeso, kpac. Ngeni warac

homecfu kecgec, yofinenggac ine kekec forau kecdac, imocac ngenaoc efaima kemma Anutuaru oruc kickedzac nga hanimaringina desigec imocngo yeac kingangkpekpe ambeso. <sup>14</sup> Ngeni dedeseriyoacac bageau kekec, imoc bic wama danggunucac bageau kecdac, imocac amma kopocsingo kunengngina mi ambeso.

<sup>15</sup> Imocac yofi annide. Nenang dedeseriyoac bageau mi kecdimbe, kpac. Nenang danggunucac bageau kecdimbe. Imocac kopocsic meficgeni, imoc mi ngereeude nga ifi mi fingeCBSO!

<sup>16</sup> Ngeni ngic monggac wanac areng kecgecdeac desiemegeddeu ngeni yeac wanac areng kecma yeac enac tofohobisia, imoc negendae. Ifi isoc ngeni kopocsicac wanac areng kecma enara tofohogeddeu homec meficgegedde. Nga ngeni enac tofoc tofohofakaac bageau kecma dindingac kekec meficgegedde.

<sup>17</sup> Anu ngeni warac kopocsicac wanac areng kecgec, imoc bic wagec wisickeec. Wisickeu kpoukpouyoacac hoannu faingunugec, ngeni ubangina hafoangoc imohai desiemema imoc tofohokecgecac amma Anutu dengereduae.

<sup>18</sup> Ngeni kopocsicac witicfunac bic mesi mesingunuya nga yaguc dindingac kekecac wanac areng amma kecdac. <sup>19</sup> Nga ngeni

sebifusiac kucmamanginagoc kecdacac ngeniac siricfu yofi deduae. Ngeni warac oruc kickedzac nga hanimaringina desiemema uba wonongagoc kekec nga singyoac kpekpe, imocac bageau wanac areng kecgec. Ifi kecma singyoac kpema kecgec. Ngeni ifi isocngoc yofinenggac oruc kickedzac nga

hanimaringina desiemema dindingac kekecac bageau wanac areng kecbisia. Kecma kpetiac kekecfu yadiseri anggecde.

<sup>20</sup> Amma ngeni kopocsicac wanac areng kecmagec dindingac kekecac yocngo naric mi garengngunuec, kpac. <sup>21</sup> Ngeni imohai kopocsicac fora mekecgec imocngo kekecngina memanganec amma ngeni yofinenggac imoc negemma gamengunuande. Faka nga angammeme ifianoc homec heficgeude. <sup>22</sup> Ngeni yaguc kopocsicac witicfunac mesingunungunuya nga Anutuac wanac areng kecdae, imocac fora yofi, ngeni kpetiac kekec kecma yadiseri angkecmagec wisickeu kekecseri megecde. <sup>23</sup> Imoc yofiac, kopocsicac buma imoc homec megecde nga Anutuac wosoefac, imoc Kebunina Yesu Kristoac amma kekecseri buma kpac nemmebesande.

## 7

<sup>1</sup> Tosofocna, ngeni dedeseriyoac negendae, imoc negenduae. Imocac yofi debeso negenduae. Ngicngac gbori kecmagec dedeseriyoacngo kunengngina amma garengyunuande, fora. <sup>2</sup> Imocac ngac mong ye ngicfu kenudeu, ngic ye kecmanungoc ngacngo yegoc dzahacemema kefecde. Dedeseriyoacac sing ifi fede. Kecma ewea homeudeu dedeseriyoacngo ngac ngicfu witickeec, imocac witiha kpac anude. <sup>3</sup> Nga ewea gbori kecmanungoc ngac ye ngic monggaru kenudeu yeac serongac degecde. Nga ewea homeudeu ine ngac ye dedeseriyoacac witicfu monggoc mi kefude. Ye naso imohai ngic monggac

ngac anudeu serongac mi anude. <sup>4</sup> Tosofocna, ifi isocngoc Anutungo Kristoac sacfusi u ngeni yegoc ngunhomeu ngeni dedeseriyoacac bageau monggoc mi kecdae. Ngeni ngic homec funac yarec, yegoc torokpema kecgcedac nga nenang Anutuac uaac fora annideac ye ifi anec.

<sup>5</sup> Nenang warac uba eseaac arennu kecmi na dedeseriyoacngo songo mangana herenina miaru homecac fora meficgekefing. <sup>6</sup> Nga yofinenggac dedeseriyoacfunac yungec yungecnunuya kecdimbe. Dedeseriyoacngo mendannunuec, imohacnac bic homeing. Dedeseriyoacfunac homema ua esea imoc wama Asuac ua gboriau emma nandimbe.

<sup>7</sup> Imocac nenang yofi denide, dedeseriyoac yengenaoc kopocsic mi ande, kpac. Dedeseriyoacngo ine kopocsicac siriha edzacnuu negenghome-duae. Ge hensongo mi ambesena. (*Makekeng 20:17; Dedeseri 5:21*) Dedeseriyoacngo ifi mi debacfu ni hensongoac siriha naric mi negenghome-bai. <sup>8</sup> Nga kopocsic ye dedeseriyoacfusing ine singa meficgema hensongofaka hania hania herena manau miacande. Amma dedeseriyoac mi febacfu, kopocsic ye homemea ambac. <sup>9</sup> Ni warac dedeseriyoara kpac kecbare dedeseriyoacngo hau negenai. Negemba imohai ine kopocsicngo kekehagoc amma ua meu <sup>10</sup> homeai. Imohai yofi henai, dedeseriyoacngo kekec meficgeudeac faifaia fede, imocngonoc homec meficgenenec. <sup>11</sup> Kopocsicngo dedeseriyoacfu singa meficgema ikocfu wangecnuma kpebucnuec. <sup>12</sup> Imocac yofi fede, dedeseriyoac imoc yengenaoc kpetiac nga

nonoyoac ifingoc kpetiac nga dindingac amma gombunga.

<sup>13</sup> Wiac gombunga, imocngo homecfu mi fainuec, kpac. Kopocsicac hania fingectegerudeac kopocsicngo ine homecfu fainuec. Nga kopocsicngo wiac gombunga mema imocngo nearu homec meficgeec. Ifi anu dedeseriyoacngo kopocsic heficgeu kopocsic ye wiac mangana yombong, imoc fingectegerec.

<sup>14</sup> Dedeseriyoac imoc Asuarunac, imoc negendimbe. Nga ni ine uba eseanagoc kecba kopocsicngo wanac menuu, kopocsicac bageu kecduae. <sup>15</sup> Nga faka nga angammeme angkecduae, imoc dafiac angkecduae, imoc mi negengecduae. Ni wiac mong ambadeac negensianduae, imoc mi angkecduae. Nga faka ubanango waanduae, imoc ine angkecduae. <sup>16</sup> Amma faka goa songona mi angande, imoc mekecduaeu imocngo yofi deseride, dedeseriyoac imoc gombunga. <sup>17</sup> Ifi anu neannaoc faka imoc mi angkecduae, kpac. Kopocsic neac here manau fede, imocngo faka imoc angkecde. <sup>18</sup> Neac hereu wiac gombunga mong mi fede, ifi negenduae, imoc uba eseaac deduae. Imoc yofi, ni faka gombunga ambadeac negengkecma ine faka nga angammeme gombunga ambadeac obohoanduae. <sup>19</sup> Fora, angammeme gombunga ambesonga negenganduae, imoc mi angkecduae. Nga faka mangana wabadeac negenganduae, imoc ine angkecduae. <sup>20</sup> Ni faka goa mi ambadeac anengkecde, imoc ambadeu ine neannaoc faka imoc mi anduae, kpac. Kopocsic herena manau

fede, imocngo ine faka imoc heficgeu anganduae.

<sup>21</sup> Faka gombunga ambesonga negembare faka manganango ine herenaunac bic erema kekecna garenggeande, imoc meficgeanduae. <sup>22</sup> Amma ubaonganau Anutuac dedeseriyoac ubangerec-goc hoanggekecbare <sup>23</sup> songo monggac singyoacngo ine sebinau fingeru henganduae. Nga imocngo negen negennau dedeseri fede, imocgoc ewema kecdape. Ewekecma kopocsicac singyoacngo sebina witicfu faima sebinau uaya mekecde.

<sup>24</sup> Ni ngic makpekpea ubahodunggoc kecma sebinagoc homecac bageau kecbare merang imohacnac mesinuude? <sup>25</sup> Anutuac dangge deduae, Yesu Kristo Kebunina yeng mesinuude. Mesinuu neanna negen negennango Anutuac dedeseriyoacac bageau kecma wanac ua mekecduae nga ubana eseango ine kopocsicac singyoac kingang kpemima kecduae.

## 8

<sup>1</sup> Nga ngicngac Yesu Kristogoc kpeketahema kecdae, yeni yoacac arennu mi makpegecde.

<sup>2</sup> Ge Yesu Kristogoc kpeketahema kecna Kekec Asuac\* dedeseriyoacngo kopocsic nga homecac singyoacac witicfunac yungecguac. <sup>3</sup> Uba esea ye dedeseriyoacac kuha memau dedeseriyoacngo wiac obohous Anutungo ua imoc yofi meec. Ye Medacyombonga sueu nenang siric mema bangecfu maec. Mau Anutungo yeac sebiu kopocsicnina desima meickeu kpac anec. <sup>4</sup> Anu nenang uba eseaac sinnu kengkeng imoc wama Tiri

---

\* **8:2:** Kekec Asu imoc Tiri Asuac dede.

Asugoc kpeketahema kengkecdimbe. Kengkecma dedeseriyoacac faka dindingac kekecninau fin-gectegerude.

<sup>5</sup> Ngicngac uba eseaac songo nga negen negeng modacandae, yeni negen negengngina uba eseaac arennu faiandae. Nga ngicngac Asuac songo nga negen negeng modacandae, yeni negen negengngina Asuac arennu faiandae. <sup>6</sup> Anu uba eseaac negen negeng imoc homehagoc nga Asuac negen negeng imoc kekehagoc amma ruaeagoc. <sup>7</sup> Uba eseaac negen negengngo Anutu ngaba am-mikecde amma Anutuac dedeseriyoac mi tofohoande. Imoc dedeseriyoacac bageau kefudeac obohoute. <sup>8</sup> Nga ngicngac uba eseaac songo nga negen negeng modackecdae, yeni Anutuac uba-songo meficgegecdeac singa obohokecdae.

<sup>9</sup> Anu Anutuac Asungo ngeneac ubahereu kecdeu ngeni Asuac arennu kegcgecde, uba eseaac arennu kpac. Nga mong ye Kristoac Asu mi mekecde, ye ine Kristoac areng kpac. <sup>10</sup> Nga Kristongo ngeneac ubahereu kefudeu sebingina imoc kopocsicnginaac amma homeec. Nga ongaasunginango ine dindingac kekecac amma kekehagoc anec. <sup>11</sup> Anutu ye Asuyango Yesu homecfnac megboriec. Amma Asu imocngo ubaherenginang kecdeu yeng sebingina homecac bageau kecde, imoc ifingoc Asuyango megboriude.

<sup>12</sup> Negen negensingoc tosofocna, negenggec, nenang turunninagoc kecdimbe nga imoc ine uba eseaac negemma kpac. Asungo bic megborinunuec, imocac amma uba

eseaac arennu kecnideac turunga mong mi fenemmede. <sup>13</sup> Ngeni uba eseaac songo nga negen negeng modacma kecgcedeu homeac areng anggecde. Nga Asuac kucfu uba eseaac angammeme kpebucgecgcedeu kechereema kecbesandae. <sup>14</sup> Anutuac Asungo ngicngacareng wangecyunukecde, yeni sasawango Anutuac medacfora. <sup>15</sup> Asu mongngo wanac menunuu monggoc kengecgoc kecnide, asu ifia mi nemmec, kpac. Nenang asu siriha mong mema Anutuac medacfora aning. Nga Asu imocngo meficnunu yeac yofi kpacma dekecdimbe, "Manna, Manna." <sup>16</sup> Nenang Anutuac nambaracfora kecdimbe, yoc imocnoc Anutuac Asu yengenaoc hepuc amma ongaasuninau faiu dekecdimbe. <sup>17</sup> Nga yeac nambaracfora kecdimbeu yeac maridzoming memeareng ifingoc amma Kristogoc areng mocgu kecma maridzoming menide. Neni nenahafoc kuc nga kibikperaginagog annideac yegoc ifingoc kpendzeng kpeni Anutungo fora nemmeude.

<sup>18</sup> Imoc yofi negensiduae, kuc kibikperagiagog ngadeu nenannu fingectegerude, imoc wiac engena yombong nga yofinenggac ebic fingecnemmekecde, imoc wiac mamea. <sup>19</sup> Anutungo deu wiac fingecdarec imoc sasawango Anutuac medacfora didiu fingectegecgcedac mamangkima yeneac tomai kecdae.

<sup>20</sup> Nga Anutungo wiac deu fingecdarec, imoc ye negemmanu dzanggeande. Yeng wiac deu fingecdarec, imoc yengenaoc dzanggedarudeac mi negensiec, kpac. Anutu yengenaoc ifi faiec.

21-22 Amma imocac yofi negendimbe, Anutungo deu wiac sasawa fingecearec, ihacnacngoc erekecma yaguc kecdimbe. Nga yeneng ifingoc wedzec horarac amma gadze yiniu homema hoaeandae, imocac witic hesima Anutuac nambaracfora yeneac amabangecfu kenggecdeac ayemmeude. Amabangec imoc witiha kpac nga imoc kuc nga kibikperagiagoc.

23 Nga imocsac kpac. Anutungo hanahema Tiri Asu nemmeec. Ifi nemmeu nenang ifingoc sebininagoc bangec yomoc wama medacforaac tatacfu bic ennideac herekiki anemmeu nasoyaac tomai kecdimbe. 24 Amma nenang wiac foraya fingerudeac negenserima tomai kecma komoc kpenide. Mong ye foraya bic henu imoc fingerudeac negenserima kecande, faka siriha ifia mi fede, kpac. 25 Nga wiac mi hengena imoc mebesandimbe, ifi negensinggema kecdimbeu modzotitia kpac mamangkima tomai kecnide.

26 Ifi kecmina Asungo kucmamaninaac amma hama meficnunu ifi me ifi numuni ngereeude, imoc mi negentegecandimbeac amma yeng agennina tima yoara kpac hereudumengau numuu Anutuaru engande. 27 Enu ngicherenina hengkecde, yeng Tiri Asuac negen negeng ifingoc negenude. Asu ye Anutuac negen negeng modacma kpetiac habu nenanggac amma nunumua faikecde.

28 Anu yofi negendimbe, Anutungo arenga faima ngicngac negengyunuma kpacyunuu yeni yeac arengfora kecdae. Ngicngac heregoc yeac songo negengandae, yeni negengyunuma kekecnginau wiac sasawa dindingac arenggema

meficyunuu ngereeyombonggeude. <sup>29</sup> Imoc yofiac, Anutungo ngicngac bic negengyunuec, yeni meisingyunuu yadiseri amma yengena Medaha isoc anggecdeac desiyunuec. Medahango munafora homac yeneac waracdacngina anudeac ifi arenggeec. <sup>30</sup> Arenggema ngicngac warac bic meisingyunuec, yeni ifingoc kpacyunuma dindigac deyemmec. Dindigac deyemmema kuc kibikperagiagoc ifingoc yemmec.

<sup>31</sup> Imocac amma Anutungo nanggenunuma nenanggoc kecmanu mongngo sinnina hedzickema naric mi memanunuude. <sup>32</sup> Anutungo Medacyombonga mi segerema sasawa nenanggac amma ngaba yeneac mariu waec. Nga nenanggac waecac amma ye ifingoc ubangerehaac torokpema Medahagoc wiac sasawa nemmeude. <sup>33</sup> Mongngo Anutuac meisingfora yoacfu faiyunuudeu, Anutungo yeneac yocac ifingoc deu firang anggecde. <sup>34</sup> Yesu Kristo yennoc homeec. Homeu Anutungo ifingoc ye homecfunac megboriu yarec. Yacma Anutuaru enec, foiau tacma nenanggac amma numukecde. Imocac mongngo meisingfora yoacfu kopocsicninagoc dema negende, ye osiude. <sup>35</sup> Amma Kristongo heresongogoc hoannunukecdeac, kekec imohacnac wiac mongngo nenang mederenunuudeacsoc mi ande. Kpendzeng me ubaebic me nunukporac anemmegecde me herehomehome me senggang kekec me manganebeso annide me dzikacbeang, imoc sasawango Kristoac songounac naric mi meicnunuude. <sup>36</sup> Yocac yomoc bic oho ohoya fede,

“Geac areng andimbeac amma yeni asoacnac kemma marai homecfu fainunukecdae. Yeneng nenenggec neni rama kpebucyunuandae, yeni isoc andimbe.”  
(*Mitiyegec 44:22*)

<sup>37</sup> Imoc sasawa fingeenemmu Kristongo heresongogoc bic hoannunuu nenang yegoc kecma feracyunuyombonggema firang amma kecdimbe. <sup>38-39</sup> Nga Anutungo heresongogoc hoannunuu nenang Kebunina Yesu Kristogoc kpeketahema kecmi wiac mongngo naric mi mederenunuude, imoc negenseriymbonggeduae. Imoc homec me kekec, angero goa me ngictau goa, wiac goa yaguc fedae me wiac ngade fingegecde, wiac goa kucnginagoc wihacnac me wiac goa kucnginagoc emuhacnac nga wiac goa Anutungo deu fingegec, yeni sasawango yeac songounac naric mi meicnunugecde.

## 9

<sup>1</sup> Ni Kristogoc kpeketahema yoc fora deduae, ikoc mi anduae. Nga Tiri Asungo here negen negenna midiu imocngo hepucna anu yofi deduae. <sup>2</sup> Ni nasosoc arengfocna yeneac amma ubahodungtoa nga ubaebicgoc kecduae. <sup>3</sup> Nga neng yeneac do mema sowecac bageau kecma Kristoaru agac kecbadeac negenduae. Neni kisicnina mocgu. <sup>4</sup> Nga yeni Israe areng, yeni manggacac medacyombong kuc nga kibikperaginginagoc kecdae. Yeni dzadzahac nga dedeseriyoacgoc kecma Anutuac womong garenggekecdae. Amma Anutungo wiac

yemmeudeac deseriymmeec, imoc yenearu fedengoc. <sup>5</sup> Nga yeni kisichangecfocngina negendae, yeneac fingeceaheunac Kristongo ngic siric amma fingerec. Ye Anutunoc, wiac sasawaac engena. Yearu dedengerec nga dedengerec fekengkecheso, imoc fora.

<sup>6</sup> Anutu yoara kuha made, ngeni ifi mi negem-bisia. Imoc yofi, Israengicngac Israe fingeceahe-unac, yenearunac goa Israe yombong mi andae. <sup>7</sup> Imocac siriha yofi, Abrahanggac bangecfora goa yeni Sara kimearunac. Imocac yofi oho ohoya fede,

“Isakaac fingeceahengo geac bangecfooga yombong anggecde.” *(Fingec fingec 21:12)*

<sup>8</sup> Sebiac arennu fingeceae, yeni Anutuac nam-baracfora, ifi mi dede. Dedzegeac bageau finge-candae, yeni Abrahanggac bangecfora yombong andae. <sup>9</sup> Ye Abraham nga Sara yerigoc yoac yofi dedzege anec,

“Ni naso deaimoc imohai habare Sarango medac mong mema kefude.” *(Fingec fingec 18:10,14)*

### *Songea arennu meisinnunuude*

<sup>10</sup> Nga imocsac kpac, Bangecnina Isaka ye Re-bekagoc feu yeng fora tombosonga kpenangyuruec. <sup>11-12</sup> Nga medac yeri mi fingeema kecmaecngoc yereac angammengira gombunga me mangana mong mi femanu Anutungo yereac Rebeka yofi bic edeec,

“Darango muneaac kingang kpeude.” *(Fingec fingec 25:23)*

Anutungo mong uayaac amma mi meisinggeude, ye songoya nga negen negengaac amma ngicngac kpacyunuande, imoc seria nanudeac ye ifi anec.

<sup>13</sup> Imocac yofi oho ohoya fede,

“Ni Yakobo heresongogoc hoanggema Esau ine ubango ukuai.” *(Marekai 1:2-3)*

<sup>14</sup> Ifiac amma yofi denide. Anutungo sing mi segeude. Ye yoara gombunga angande. <sup>15</sup> Yeng Mose yofi edeec,

“Ni monggac wosoefac ammibadeac negemma ye wosoefac ammibade. Nga monggac ubamangang ammibeso negenduae, ye ubamangang ammibade.” *(Makekeng 33:19)*

<sup>16</sup> Ifi anu Anutungo yengena wosoefahaac amma ngic meisinggeude nga ngic ye yengenaocngoc songo meficgeecac me uatoa meecac amma ifi mi fingerude. <sup>17</sup> Mitikibiu yoac oho ohoya fede, imocngo Farao yofi edeec,

“Ni gearu kucna bangeha bangeha edzacyunubade nga kpacna dekperagigec kenu negendacgecdeac amma ge ngictau faiguba genggecde.” *(Makekeng 9:16)*

<sup>18</sup> Imoc yofi, Anutungo mong wosoefac ammibesonga negendeu, imoc ammiude. Amma monggac herea dzegebesonga negendeu, imoc dzegeude.

<sup>19</sup> Ge yoacna imoc negemma yofi denade gedang, “Anutuac songo nga negen negeng kpeudeac sing mi fede. Nga sing kpekpe mi febac dede yeng ni kopocsicngoc naric mi debac.” <sup>20</sup> Bangecngic ge negenna, ge ngicsac, ifi dema Anutuac yoac turunga mi merembesena.

Marikibi minginango wiac mong meu wiac maringo memea, imocngo mingina naric mi kpesimiude,

“Ge nocac ni ifia menunec?” (*Yesaia 29:16; 45:9*)

<sup>21</sup> Enangmemengic ye songeaac arennu ua naric meude, ye gbaki mema imocngo enang mong uaya engena meude nga enang mong uaya mamea naric meude.

<sup>22-23</sup> Enang goa yeni kuc kperaginginagoc anggecdeac Anutungo warac wosocefac ayemmema mengereyunuec. Ngicngac yeni yeac kuc kibikperagiagoc henggecde, songoya ifi anec. Ye desi desiac fakaya ngicngac edzacyunuudeac nga yeni kuha negenggecdeac enang goa yeni kpedzac kpedzameaac arennu bic faifaia nandae, yeneac amma modzotitia kpac nasoherec tomaingina kecande, ye songea naric modacma ifinoc anude. <sup>24</sup> Imocac nenannoc kpacnunuec. Imoc Yuda arengsac kpac, ye bangec monnunac ngicngac momoc kpacyunuec. <sup>25</sup> Ye profete Hoseaac kibihi ifingoc yofi dede,

“Ngcngac areng mong warac neac ngicngac mi kecgec, yeni neac ngicngac, ifi kpacyunubade. Nga ngac mong heresongogoc mi hoanggeai, ye neac songongac, yeac kpara ifi kpachade.” (*Hosea 2:23*)

<sup>26</sup> Nga bangec monnunac ngicngac Anutungo ye-neac yofi deec,

“Ngeni neac ngicngac kpac.” Amma bangec imohaingoc yofi kpacyunugecde, “Yeni Anutu kekehagoc yeac medacfora.” (*Hosea 1:10*)

27 Yesaiango ine Israe yeneac negemma yofi kpacma dede,

“Israe ngicngac yeni kpetengina kuneng, imoc kondunggac sangi isoc anudeu ni sifu yeneacunac noboha efeanecsac onggongyunuba komoc kpegecde. 28 KEBUNGO bangecfu ngicngac yoacngina bicbic isinggema desiyunuma uaya mesiude.” *(Yesaia 10:22-23)*

29 Nga Yesaiango kpefingyoac yofi bic deec,

“KEBU Kuctoa Mingina, yeng bangecfocnina noboha goa mi onggongyunuu komoc kpebau debac Sodong nga Gomora yeni isoc ambing.” *(Yesaia 1:9)*

30 Ni yofi torokpema deduae, bangec mon-nunac ngicngac, yeneng dindingac kecgecdeac seseriua mong mi mekecma kecec dindingac eng meficgegec. Yeni negensinggegec, imocac amma Anutungo dindingac kpacyunuec. 31 Nga Israe ngicngac yeni ine dedeseriyoacngo kecec dindingacfu faiyunuudeac seseriua mekecgec. Mekecma dedeseriyoacfusing dindingac kecec mi meficgegec. 32 Yeni faka nga angammemengi-naac negensima negen negensing fora imoc ine wagec. Yeni hocfu kpondzong heima mayunuec. 33 Imocac yofi oho ohoya fede,

“Negendae, ni Sionnu hoc mong faiba imohai yeni kpondzong heigece nga peperandziu tifainggema negemmangang meficgegecde. Nga mongngo ye negensinggeudeu ye game kpekpeu mi enude.” *(Yesaia 8:14; 28:16)*

# 10

<sup>1</sup> Tosofocna, Anutungo arengfocna kopocsicac ebicfunac mesiyunuu komoc kpegecde, imocac heresongonango negengyombonggema ye numu-mianduae. <sup>2</sup> Amma ni yeneac hepuc amma yofi deduae, yeni Anutuac kingang kpegecdeac ngombongemema seseri angkecdae. Nga ye dafi kingang kpemibesonga, imocac negen negen-tegec ine mi feyemmede. <sup>3</sup> Amma yeni yenaoc-ngoc sing dindingac meficgegecdeac arenggema uaya mekecdae. Nga Anutungo sing mong bic meficgema ngicngac dindingac deyemmeande, sing imoc ine mi negendae. Ifi amma yeni Anutuarunac kekec dindingac fede, imocac bageau kegecdeac waandae. <sup>4</sup> Kristongo dedeseriyoac hafoangoc modacdaru dedeseriyoacac ua wisic wisickea anec. Imocac amma ngicngac ye negens-inggeandae, yeni sasawango dindingac kekec meficgegecde.

<sup>5</sup> Mosengo dedeseriyoacac sing dindingac kekec imocac yofi ohoec fede,

“Ngic mong ye dedeseriyoac modacdarude, yeng sing imohai kekehagoc amma kefude.”  
(*Sesememe 18:5*)

<sup>6</sup> Nga Anutungo negen negensinninaac amma dindingac denemmeude, sing imocngo yofi dede,  
“Ge geanggaoc ubaheregango yofi mi kpesiemebesena, merang kurumennu enude?”  
(*Dedeseri 30:12*)

Imoc Kristo kurumennunac memaudeac negemma dede. <sup>7</sup> Me yofi, “Merang hofeu kemeude?” Imoc Kristo homecfunac meereudeac negende. Ifi mong mi negembisia.

<sup>8</sup> Imocac geac yoac yofi dedea fede,  
 “Anutuac yoac imoc hoanggau nga enacgau  
 amma heregau fede.” (*Dedeseri 30:14*)

Nga negen negensinggac yoac imocnoc dekper-  
 agingemmekecdimbe. <sup>9</sup> Imoc yofiac, ge enacbibic-  
 gango, Yesu ye Kebu, imoc dekperaginade nga  
 Anutungo Yesu homecfunac megboriec, imoc  
 negensinggenadeu Anutungo kopocsicgaac ebic-  
 funac mesiguu komoc kpenade. <sup>10</sup> Nenang uba-  
 hereninango ye negensinggeni yeng dindingac  
 denemmeude. Nga enacbibicninango ye dekper-  
 agini yeng kopocsicninaac ebicfunac mesinunuu  
 komoc kpenide. <sup>11</sup> Mitikibingo imocac yofi dede,  
 “Mongngo ye negensinggeudeu, ye gamekpekpeu  
 mi enude.” (*Yesaia 28:16*)

<sup>12</sup> Anu yudaareng nga grihareng siricngira mong  
 mong mi ande. Kebu ye sasawa nenanggac Ke-  
 bunina. Nga ngicngac yeac kpac kpacandae, yeni  
 ubangerecgoc keneha hania hania naric yem-  
 meude. <sup>13</sup> Nga

“Ngicngac yeneng KEBUAC kpac kpacgec Anu-  
 tungo yeni sasawa kopocsicnginaac ebic-  
 funac mesiyunuu komoc kpegecde.” (*Yoele*  
*2:32*)

<sup>14-15</sup> Nenang mong sueni yeng Anutuac yoac  
 dekperagiyemmeude. Nga Anutuac yoac dekper-  
 agiu negemma naric negensinggegecde. Ne-  
 gensinggema yeni Kebuac kpara kpacma komoc  
 kpegecde. Imocac yofi oho ohoya fede,

“Ngic yeni siduc gombung mehakecgec ngicngac  
 yeneng yeneac hani udumeng ubangere-  
 hagoc negenggecde.” (*Yesaia*  
*52:7*)

16 Anu ngicngac yenearunac homacngo siduc gombung imoc ine mi tofohogec. Yesaiango yofi dede,

“Kebu ge negenna, yoac dekperagiyemmeing, imoc yeni mi negensinggecec.” *(Yesaia 53:1)*

17 Nga Kristoac yoac dekperagiyemmeni yeni yoara negengandae. Amma yoac imoc negemma negensinggecede.

18 Anu Israe yeni yoara kedzacnginango mi negenggec me? Ifi kpac, yeni bic negenggec. Yofi oho ohoya fede,

“Ubaudumengngina imoc bangecfu kengkecede. Yeni yoacnginango bangectoa bangec yomocac noboc noboc wisic wisickeau kendarude.” *(Mitiyegec 19:4)*

19 Ifiac amma monggoc deba, Israe ngicngac yeni yoara ubaherenginango negentegecgec me? Mosengo Anutuac enac mema imocac yofi deec,

“Ni faka angemmeba ngeni ngicngac areng mong bangec mocguac areng mi andae, yeneac keracmangang anggecede. Nga areng mong negen negentegecngina kpac, ngeni yeneac herebu negenggecede.” *(Dedeseri 32:21)*

20 Yesaiango kengeha kpac imocac torokpema bangeha bangeha ngicngac, yeneac yoac yofi deec,

“Ngicngac yeneng ni mi hofocnuma eng mefic-nugec. Nga neac dekpesia kpac kecgec, yenearu fingecyemmeai.” *(Yesaia 65:1)*

21 Amma Israe areng yeneac ine yofi deec,

“Ngicngac areng mong yoacna mi tofohoandae nga yoac kpekpe kecdae, yeneng hagecdeac

asoacfunac kemma tofocnac marina  
sineyemmekecduae.” *(Yesaia 65:2)*

## 11

<sup>1</sup> Imocac amma yofi negemma kpesiduae, Anutungo ngicngacfora bic wayunuec me? Imoc kpac! Neannaoc Israengic Benyaminggac arenunac nga kiscina Abrahang. <sup>2</sup> Anutungo ngicngacfora bic meisingyunuma mi wayunuec, kpac. Nga Eria ye hereebiha Anutuac kicfu dekperagima israengicngac yeneac yofi dema numuec, imoc mitikibiu oho ohoya fede, <sup>3</sup> “Kebu, yeni geac profetefocga yunuhomegec nga geac arataga kpembarackegec. Nga ni mocgungosac kecbare kekecna meickegecdeac negendae.” <sup>4</sup> Ye ifi numuu Anutungo ine turunga yofi meremmiec, “Ni ngicfocna 7 tauseng bic segereyunuba kecdae.

Nga yeni nemu Baari yearu fafoc mong mi heimigec.” Ngeni imoc negembisia. *(1 Ngictau 19:10,14,18)*

<sup>5</sup> Ifi isocngoc Anutungo yofinenggac yenearunac tosea meisingyunuma wosoefaha ayemmeu yengena habubisic mong amma kecdae. <sup>6</sup> Yeng meisingyunuma danggunuha yemmeec, imoc yenang angammemengina gombungaac amma mi meisingyunuec, kpac. Ye angammemengina gombungaac amma meisingyunubac dede wosoefaha imoc wosoefac fora mi ambac.

<sup>7</sup> Imocac amma yofi fede, Israe yeni wiac megecdeac uatoa mekecma imocac fora mong mi meficgegecde. Nga Anutungo ngicngac yeneac botucfunac meisingyunuec, yeneng ine wiac imoc meficgegecde. Anu Israe noboha yeni ubaseri nga

ubafong amma kecdae. <sup>8</sup> Imoc yeneac yoac mong yofi oho ohoya fede,

“Anutungo faka meu yeni ongaasungina dzingfong anec. Amma kicnginango wiac mong mi hemma kedzacnginango wiac mong mi negenggec. Yeni ifia keceregecngo yaguc kecdangoc.” (*Dedeseri 29:4; Yesaia 29:10*)

<sup>9</sup> Imocac Dawidingo yofi deec,

“Yakaneneac fakangina angandae, imocngo subabanggeng nga ufic isoc meyunuu kopocsicnginaac turunga ambeso. <sup>10</sup> Wiac mong mi henggecdeac yeni kicngina pisickebeso. Ge nasoya kpac ngadehokuc meyununa kecbisia.” (*Mitiyegec 69:22-23*)

<sup>11</sup> Ni yofi torokpema kpesiba, Israe yeni mayunuudeac kpondzong heigec me, imoc kpac. Yeni Anutuac yoac ferahegecac amma Anutungo bangec monnunac ngicngac, yeni kopocsicac ebicfunac mesiyunuu komoc kpegecde. Israe yeneng yenemma keracmangang anggecdeac ifi anec. <sup>12</sup> Nga Israe yeni Anutuac yoac ferahegec, faka imocngo Anutuac wosoefactoa heficgeu bangeha bangeha yenearu kendarec. Amma Israe yeni Anutuac sinnu makpegec, imocngo bangec monnunac ngicngac, yeni wiac gombunga homac yombong meficgeyemmec. Kecma, Israe ngicngac sasawango negensinggecde, naso imohai wiac engena yombong fingerude.

<sup>13-14</sup> Anu bangec monnunac ngicngac kecdae, ngeneac yofi deduae, neanna arengfocna yeneng ngeneac keracmangang anggecde. Amma yeni sing imohai ngeni isoc kopocsicac dzuac

dzuac mema komoc kpegecde. Ifi fingerudeac negemma neng ngeneac aposoro anai. Amma ua mekecduae imocac negemba engena yombong ande. <sup>15</sup> Anutungo Israe ngadehema waec, imocac bangec monnunac ngicngac ngeni Anutugoc uba mocgu amma ruae meficgegec. Ifi fedeu Anutungo monggoc Israe hoangyunuude, imocngo heficgeu homemea yeneng gborima kekec meficgegecde.

<sup>16</sup> Ngeni yaka buma heima waraima Anutu migecdeu yaka sasawa imoc kpetiac anude.\* Amma ic godea kpetiac andeu fawa sasawa ifin-goc kpetiac anude.

<sup>17</sup> Anutungo oriwa fora imocac fawa goa metackema meickema, imocac tatahau, ge kate oriwa fawa yombong, kapia mong kperecgeguma oriwa forau torokpeguec. Nga geng fawa fora yenigoc kecnecc isoc yofi anude, ge ic godeagoc torokpema kecma kerecga ihacnac taima kecnade. <sup>18</sup> Ifi andeac, ge sebiengeng amma fawa noboha yeneac yofi mi negembesena, “Neng feracyunuduae.” Ge ine sebiengeng annadeu yofi negembesena, ge ic fawasac, geng ic godea mi nanggenec nga ic godeango ine ge nanggeguma kecde. <sup>19</sup> Ifi deba geng yofi denade gedang, “Yeni ninoc icfu torokpenugecdeac fawa goa metackegec.” <sup>20</sup> Denec isoc, yeni mi negensinggegecac amma metacyunuec. Nga geng

---

\* **11:16:** Ye ic sogonggac dede. Imocac yoac Bangec kisiu 15:17-21. Yaka buma heima Anutuac sese faibesonga imocac yoac yomohai fede: Makekeng 23:19; 34:22; Sesememe 2:12,14; 23:10,17,20; Bangec kisiu 18:12; 28:26 Dedeseriyoac 26:2,10

negensinggenecac amma seria nangkecnecongoc. Imocac negen negenggau sebiengenga kpac amma kengecgoc kecbesena. <sup>21</sup> Anutungo yengena fawa mi onggongyunuecfu ge ifingoc naric mi onggongguude.

<sup>22</sup> Ge Anutuac faka yumea nga demetinga seria fede, momoc hentegecbesena. Ye ngic mayunuec, yeni demetinga seria ayemmeec nga ge ine faka yumeau anggenec. Ge yeac faka yumeaac bageau mi kecnadeu ge ifingoc herecgeguude. <sup>23</sup> Nga fawa tosea negen negensingngina kpac, yeneng meremma negen negensinggoc anggedeu ye icfu monggoc torokpeyunuude. Nga Anutungo icfu torokpeyunuudeac naric mi obohode. <sup>24</sup> Ge kateac oriwaac fawa kapia, imoc herecgeguma oriwa ic fora mong geac areng mi ande, imocgoc torokpeguudeac mi ebiriudeu, oriwa ic fora yengena fawa monggoc toro torokpe ua imocngo wiac efea yombong anude.†

<sup>25</sup> Tosofocna, ngeni ngenanggac negenggec engena ambacac amma yoac mong yomoc sufu sufuya fede, imoc negenggecdeac negenduae. Imoc yofi, Israe noboha yeneac uba negen negengngina imoc fonggoma femanungoc bangec monnunac ngicngac, ngeni erema hakecma kpetenginaac sirihau hafoangoc ambeso. Kpetengina hafoangoc anuguc Israe areng tosea ifingoc erema torokpegecde. <sup>26</sup> Ifi anu Kebungo Israe hafoangoc kopocsicac ebicfunac mesiyunuu komoc kpegecde. Imocac yoac yofi oho ohoya fede,

---

† **11:24:** Ic nenea gbomegoc didimang yeneng sing ifia metorokpeandae.

“Memengerec ngic ye Sionnunac hau Anutu ngadeheandae, yeneac faka mangana imoc sasawa Yakoboac arennunac meickeude.”

<sup>27</sup> “Nga kopocsicngina meickebade, imocngo naso imohai dzadzahacngina feude.” (*Yesaia 59:20-21; 27:9; Yeremaia 31:33,34*)

<sup>28</sup> Siduc gombung hau Israe yeni imoc ngadehema Anutugoc ngaba angkecma ngenec sing meefaigec. Anutungo ine Abrahanggac bangecfora meisingyunuma kisicfocnginaac amma hoangyunukecde. <sup>29</sup> Anutungo ngicngac kpacyunuu wosoefacfu kuc yemmema negen negenga ngade meremma monggoc wangecyunubac, faka imoc mi femide, kpac.

<sup>30</sup> Amma bangec monnunac ngicngac, ngeni warac Anutuac yoac kpekpe kecgec nga yofinenggac Israe yeneng yeac yoac kpekpe kecgecac amma Anutuac wosoefac ngenearu fingerude. <sup>31</sup> Yeni hanahema Anutuac yoac kpegecac ngeni Anutuac wosoefac megec. Nga Anutungo yofi faiec, ngeni wosoefac imoc megecguc yeni imoc ifingoc megecde.

<sup>32</sup> Anutungo ngade ngicngac sasawa wosoefac ayemmeude. Ye imocac hanahema ngicngac yoackpekpenginaac amma witicfu faiyunudarec.

<sup>33</sup> O, Anutuac semeng dzohongagoc fede nga negen negenga imoc kuneng nga kpeukeme kemea. Anu yeac desi desiac hania nga fakaya amma angammemea, imoc negen negennina feraheude.

<sup>34</sup> Imoc yofiac, yeac negen negennu wiac fede, imoc ngic mongngo naric mi negenude. Nga

mongngo ye negen negeng naric mi meficgemiude. *(Yesaia 40:13)*

<sup>35</sup> Amma ngic mongngo hanahema Anutu wiac mong miecfu ye imocac turunga kpoumide, imoc kpac yombong. *(Hiobe 41:11)*

<sup>36</sup> Anutu ye yengenaoc wiac sasawa meficgedarec. Imoc yengena kucfu fedacde amma yengena songo fingerudeac faifaia. Yearu dedengerec nga dedengerec fekengkecbeso, imoc fora.

## 12

<sup>1</sup> Ifi anu negen negensingoc tosofocna, Anutungo wosoefac kuneng angemmeecac dederece angemmema yofi deduae. Ngeni Anutuac kicfu asuu ua fora mema sebingina desigec imocngo Anutuac sese kekehagoc nga kpetiac anu yeng negenu ngereebesoo. <sup>2</sup> Ngeni bangectoa bangec yomocac ngicngac yenigoc angamemengina siriha mocgu mi ambeso. Anutungo uba negen negengngina heigboringemmeu ngeni Anutuac songo negengising anggec yeng wiac kpacgoc nga gombunga yombong anu imoc negenu ngereeude, imocac siriha naric negentegecgecde.

<sup>3</sup> Anutungo wosoefac anenu ni imocac siriha ngeni sasawa yoac yofi edengunuduae. Ge geangaac siricfu isingemema feracmarabaha kpac Anutungo negen negensinggac kpetea genec, imocac siriha modacbesena.

<sup>4</sup> Sebi ye hafoangoc mocgu ande, imocac manau oruc kickedzac nga hanimarina fede. Amma yeni uangina mocgusac mi meandae, kpac. <sup>5</sup> Ifi isocngoc nenang homac amma Kristoac manau

sebi mocgu andacdimbe nga neni tembuc tembuc sasawa yeneac tosea.

<sup>6</sup> Anutungo danggunuha nemmeec, imocac sirihau wosoefahaac kuc amma ua sirihau mong mong nemmeec, imoc fenemmede. Anutungo wosoefahaac amma mong profeteyoac deudeac miu, ye negen negensing femide, imocac sirihau modacma debeso. <sup>7</sup> Nga Anutungo ngic me ngac mong ogofora meficyunuudeac kuc nga ua miu yeng memefic uanoc mebeso. Nga kpoukpou uaac kuc femide, yeng imocac sirihau ngicngac kpouyemmebeso. <sup>8</sup> Mong ye ogofora negen negenggina midima demeseri ayammeudeac kuc femide, ye uaya imocac sirihau mekecbeso. Mong ye ubangerecac ngicngac wiac hania hania eng yemmeande, ye wiac imoc wosoefacfu yemmebeso. Nga enara kecma ua imoc meande, ye seseri amma uaya mebeso. Nga ubamangang negemma memeficua meande, ye ubangerecfu nga songogoc ngicngac ogofora meficyunubeso.

<sup>9</sup> Ngeni heresongogoc hoangemekecdae, imocngo faka fora ambeso. Ngeni faka nga angammeme mangana ngadehema faka gombunga serima angkecbisia. <sup>10</sup> Nga ngicngac negen negensinggoc kecdae, ngeni botucnginau heresongogoc hoangemema eweheihei angemegecdeac seserigoc feracemebisia. <sup>11</sup> Amma ngeni ua serima megecdeac modzotitia kpac kecma herengina wagec Asungo midiu ngeni Kebuac wanac areng kecma yeac ua mekecbisia. <sup>12</sup> Nga Anutungo wiac fingecongemmae deec, imoc fingerude, ngeni ifi negemma sogaibisia. Nga kpendzenggac manau ngisima

kecma mamangkima numukecbisia. <sup>13</sup> Amma kpetiac areng yeneng wiac monggac obohogec ngeni ebicngina negemma wiac yemmebisia. Nga ama monnunac goa hagec ngeni ama heiyemmegecdeac angemmebeso.

<sup>14</sup> Amma ngicngac ngunukporac angemmegec ngeni yeni kenecyunubisia! Ngeni kenecyunuma mong mi sowecyunubisia. <sup>15</sup> Ngicngac sogaima kecandae, ngeni yenigoc sogaibisia. Nga ngicngac kiacandae, ngeni yenigoc kiacbisia.

<sup>16</sup> Ngeni negengemema uba mocgu ambisia. Nga ngeni mamea yenigoc tacma ua mamea naric mebisia, tatac engenaac mi angemmebeso. Ngeni tembuc tembuc ngenang negen negengtoangi-nagoc dema ifi mi negengemebisia. <sup>17</sup> Nga ngicngac memanganengunugec ngeni yeneac turunga mangana mi merengyemmebisia. Ngeni ngicngac sasawa yeneac botucfu faka gombunga ayam-megecdeac arenggema kecbisia. <sup>18</sup> Ngeni ruagoc kegcgecdeac kuc fengemmede, imocac sirihau ngicngac sasawa yenigoc ruaeac sinnu kecbisia. <sup>19</sup> Songo tosofocna, faka mangana angemmegec, imocac turung mi kpouyemmebisia. Anutungo turungngina kpouyemmeudeac titing faimagec yengenaoc manganaac turung kpoukpou ua imoc mebeso. Imocac yofi oho ohoya fede,

“Manganaac turung kpoukpou, imoc neac ua, Kebungo ifi dede.”

*(Dedeseri*

*32:35)*

<sup>20</sup> Ngeni yofi ambisia,

“Ngabaga hereaac homeu geng yaka mibesena nga dokuac ammiu geng doku gumebesena. Ge ifi annadeu gerecwewengaima

oruhau kpeturanggena tarude.” *(Yoac negen negengagoc 25:21-22)*

<sup>21</sup> Ge manganango memaguudeac titing mi faimibesena, ge ine faka gombangango mangana memama firang ambesena.

## 13

<sup>1</sup> Gawamangfocnina kunengfocnina kecdae, nening yeneac bageu kecma enacngina tofohoma kecbisina. Gawamang sasawa imoc Anutu yengenaoc deu fingegec yea kpac mong mi fingenec. <sup>2</sup> Imocac mong ye gawamangfocnina yeneac yoac kpeude, ye Anutungo areng faiec, imoc kpeude. Amma ifi angandae, yeni yenaoc angam-memenginaac turunga taima ebic meficgegede. <sup>3</sup> Nga kia gawamangngo ngicngac faka gombunga angkecdae, yeni kengec mi meficgeyemmegecede, kpac. Ngicngac faka mangana angkecdae, yeni ine kengec meficgeyemmegecede. Nga ge kia gawamang yeneac kengeha kpac kecnadeac negennec isoc faka gombunga angkecna kia gawamangngo dengereguude.

<sup>4</sup> Geng gombunga kecnadeac amma yeni Anutuac kingangngic kecdae. Amma yeni foracngoc wasaibeang kucmamayagoc mi mekecdaeac faka nga angammeme mangana meficgenadeu ine kengecgubeso. Yeni Anutuac kingang ngicfora kecma manganameme yeneac turunga kpouyemmegecede. <sup>5</sup> Nga turung kpoukpou ua, imocacsac kpac, ngeni negeng madzac ambauac ifingoc enacngina tofohobisia. <sup>6</sup> Gawamangfocnina yeni wisic wisickea kpac Anutuac bageu ua imocnoc mekecdae. Nga ngeni imocacnoc takesi faiandae.

<sup>7</sup> Ngeni takesimeme yeni takesi yemmebisia nga finacac takesi degec imoc yemmebisia. Amma kunengfocngina yeneac kengecngunuu enarafocngina eweheihei ayemmebisia. Nga wiac ayamebesonga dedea fede, imoc sasawa andachisia!

<sup>8</sup> Anu ngeni turungngina mong fedeu imoc bic kpoubisia. Ngeni heregoc songo negenge-mema kecbisia, faka imocac turung ine wisic wisickea kpac fekefude. Mong ye ngic ogea heresongogoc hoanggeude, yeng dedeseriyoac hafoangoc modarude. <sup>9</sup> Dedeseriyoac goa yofi fede,

“Ge kaisero mi ambesena, ngicngac mi yunuhomesesena, hamangec mi mebesena, hensongo mi ambesena.”  
(*Makekeng 20:13-15,17; Dedeseri 5:17-19,21*)

Dedeseriyoac imoc nga dedeseriyoac goa tosea, imoc yoac mocguac manau kpeturanggedacma yofi fede,

“Ge geangga anggengande, siriha imocngoc gegoc wegena kecde, ye heresongogoc hoanggebesena.” (*Sesememe 19:18*)

<sup>10</sup> Nga mong ye ngicngac heresongogoc hoangyunuande, yeng ogofora ifingoc heresongogoc hoangyunuude. Ye naric mi memanganeyunuude. Ifi anu heresongogoc kekecngo dedeseriyoac hafoangoc modarude.

<sup>11</sup> Ngeni faka imoc mekecma naso yomocac negemma efaima kecbisia! Imoc yofiac, neni hanahema Kebu negensinggeing, imohai negenni naso herea isoc feec. Yofinenggac ine komoc kpenide imocac naso wegenedeac ngeni gauunac

gborima yacbisia. <sup>12</sup> Tofocnac bic kpac anudeac ande nga ama wereckenudeac ande, imocac nenang kundungac angammeme wadacma kperagiaac tebemareku heima mekecbisina. <sup>13</sup> Amma wiac wenackperagiu angana ande, imoc modacbisina. Nenang doku seria nene nga kaisero amma sicsauc faka hania hania, imoc mi angkecbisina. Amma ewekpekpe nga keracmanganggoc kekec wadacbisina. <sup>14</sup> Uba eseaac songongo ngenearu yacbacac ngeni sebinginaac songo mi nanggebisia. Ngeni Kebunina Yesu Kristo ngakpi isoc heima kecbisia.

## 14

<sup>1</sup> Ngic mong ye negen negensinggoc kecma kucmama kefu ngeneng yengena negen negensingaac deendema mi ambisia, kpac. Ngeni ye botucnginau heitaima hoanggebisia. <sup>2</sup> Goa yeni Kebu negensinggema yaka sasawa naric nedacgecde. Nga goa ine Kebu negensinggema kecma kucmama amma semeng uac yakasac negecde. <sup>3</sup> Ngic mong ye wiac sasawa neande, yeng ogea yaka goa segea fede, ye mi ngadehebeso. Amma mong ye yaka goa segea fede, yeng ogea wiac sasawa neande, imoc kopocsihagoc mi debeso. Anutungo ye bic hoanggeec. <sup>4</sup> Geng ngic monggac kingangngic angammemea isinggema ye kopocsihagoc denadeac kuc mi genggena, kpac. Ye angammemeango deu maude me nanude imoc kebuyango ine naric deude. Amma kingangngic ye nanudengoc, Kebungo imocac kuc miudeac mi obohode.

<sup>5</sup> Ngic mong ye uameme sasawa yene arunac monggac negenu engena angkecde. Nga mongngo ine uameme sasawa imocac negenu siriha mocgungoc angkecde. Ngic tembuc tembuc ye yengena ubea ireckedaru damocngo naric ande, imoc negenserima kecbeso. <sup>6</sup> Ngic uameme monggac negenu engena angande, ye Kebu negensima ifi anude. Nga yaka sasawa neande, yeng Kebuac negensima Anutu ubangerec edema yaka neude. Nga ngic yakasege angande, ye ifingoc Kebuac negensima Anutu ubangerec edeudengoc. <sup>7</sup> Nenanggarunac mongngo yengenaac amma kecde, imoc mi fede. Nga mongngo yengenaac amma homeude, imoc mong mi fede. <sup>8</sup> Nenang gbori kecnideu Kebuac amma kecnide nga homenideu Kebuac amma homenide. Home nide me gbori kecnideu Kebu yengena arennoc kecnide. <sup>9</sup> Kristo ye gbori kecdimbe nga homegec nenanggac Kebu, imocac amma ye homema monggoc gborima kekec meec.

<sup>10</sup> Ge tosogaac angammeme isinggema desinade me tosoga ngadehema memanade, imoc naric mi ande. Nocac nenang sasawa Anutuac yoacfu nambesandimbe. <sup>11</sup> Mitikibiu yoac yofi bic oho ohoya fede,

“Kebungo yofi dede, ‘Ni kekec mingina. Imocac ngicngac sasawa yeni neac kicfu fafoc heinenggecde amma nedzarang sasawango Anutu kecde, imoc dekperagigecde.’ ” *(Yesaia 45:23)*

<sup>12</sup> Ifi anu nenang sasawa tembuc tembucnina namma haifakanina bangecfu aning, imocac

siduc Anutu dekperagimibesandimbe.

<sup>13</sup> Nga nenang tosofocnina yeneac faka monggoc isinggema mi demanganeyunubisina, kpac. Ngeni ine yofi isinggehomebisia, tosofocnina mayunuudeac sinnu ic me hoc me botac mong mi faibisina. <sup>14</sup> Anu yaka me wiac mong imoc yengena seuha mi ande, imoc Kebu Yesugoc kpeketahema kecma ireckema negenseriduae. Nga mongngo ine wiac monggac dema imoc seuhagoc, ifi negensiudeu, wiac imoc yearu seuhagoc anude. <sup>15</sup> Nga geng yaka mong nena negen negensingoc tosoga imocac ubaebic meficgeudeu ye heresongogoc mi hoanggema kecneac. Kristongo ifingoc tosogaac amma homeec, ye yaka nenegaac amma makpema manganebacac wabesena. <sup>16</sup> Imocac amma ngeni wiacngina seuha kpac mekecdae, imoc gombunga garenggema kecgecdeu, goa yeneng wiacngina gombunga fede, imocac deendema mi ammigece. <sup>17</sup> Imoc yofiac, nenedoku imocngo Anutuac eucererenggac fora mi ande. Tiri Asungo faka dindingac nga ruae amma sogac sogai nemmeande, imocngo ine Anutuac eucererenggac fora ande.

<sup>18</sup> Anu mong ye sing imoc modacma Kristoac kingang kpekecde, ye Anutungo negemmiu ngereeude nga ngicngac yeneng ifingoc ye hennegeng ammigec naric anude. <sup>19</sup> Imocac nenang ruaefakau meficemema angammemengina nanggeemema emekpesi angemebisina. <sup>20</sup> Imocac ge yakagaac amma Anutuac ua mi hendzicna. Yaka sasawa imoc kongaha, imoc fora. Amma yaka nene

fakagango tosoga naric ammiu makpeude.  
<sup>21</sup> Ge yakagango tosogaac ubea memanganema ammiu makpebacac geng yang me waingdoku segega kecnadeu imocngo ngereeude. Me faka nga angammemega mongngo tosoga ubaebic meficgemibacac fakaga imoc wana ngereeude.

<sup>22</sup> Amma geng wiac goa negen negenggau negenna naric anu imoc geanggaoc Anutuac kicfu mekecbesena. Nga ngic mong ye wiac goaac negenu naric angkecde nga imocngo hereebic miu yoacfu mi faiemekecde, ye kenehagoc. <sup>23</sup> Ngic mong ye yaka goa negengyohocfu neude, yeng yoacfu makpeude. Ye mi negensinggema yaka imoc sifu neude. Faka nga angammeme negen negensinggoc mi angkecdimbe, imoc sasawa kopoc-sihagoc.

## 15

<sup>1</sup> Ngicngac Kebu negensinggema seria nandimbe, nenang kucmama kecdae, yeneac ebic serima tofohoma nenanggacsac negemma meficemema mi kecbisina. <sup>2</sup> Amma nenang tembuc tembuc ngicngac wegena kecdae, yeni ngereegecdeac nga yeni Kebu negensinggema yadiseri anggecdeac kingang kpeyemmebisina. <sup>3</sup> Kristongo ifingoc yengenaac ngereeudeac ua mi meec, kpac. Yeng faka anec imoc yofi oho ohoya fede,

“Desusuic areng yeni desusuic anggenggec, imocngo neac witiu enec.” *(Mitiyegec 69:9)*

<sup>4</sup> Mitikibiu warac wiac sasawa ohodacgec, imoc nenang edekpou anemmegecdeac oho ohoya

fedede. Yoac negenni imocnggo meserininuma nanggenunuu wiac fingeenemmeude, imoc negenseridimbe. <sup>5</sup> Amma Anutungo modzotitia kpac nga nangge nangge minginango meficngunumanu ngeni Yesu Kristoac negen negeng modacgec negen negengngina mocgu ambeso. <sup>6</sup> Ifi amma ngeni ngenahafoc enacurecfu Kebunina Yesu Kristoac Anutu nga Manggac dengeregecde. <sup>7</sup> Nga Anutuac kpac kuneng fingerudeac negemma Kristongo hoangngunuec, ifi isocngoc ngeni hoangemebisia.

<sup>8</sup> Ni yofi edengunuduae, Anutungo warac bangefcocnina yenigoc yoac dedzege anec. Nga Kristongo Anutuac yoac fora meseriudeac sebi tosangina herec herecgea yeneac kingang kpekpe anec.

<sup>9</sup> Ifi anu bangec monnunac ngicngac, yeneng ifingoc Anutu wosoefahaac amma dengeregec. Imocac yofi oho ohoya fede,

“Imocac ni bangeha bangeha ngicngac areng tosea, yeneac botucfu dengereguma yegecfu kpacga afehebade.” *(2 Samue 22:50; Mitiyegec 18:49)*

<sup>10</sup> Amma monggoc yofi dede,

“Bangec monnunac ngicngac, ngeneng yeac ngicngac arengforagoc kpeturanggema ngenahafoc sogabisia.” *(Dedeseri 32:43)*

<sup>11</sup> Amma mong yofi,

“Bangec monnunac ngicngac, ngeni KEBU fendzonggema dengerebisia. Ngiha ngiha sasawa ngeni KEBU afehebisia.” *(Mitiyegec 117:1)*

<sup>12</sup> Nga Yesaiango torokpema yofi dede,  
 “Isaiac godeaarunac sera mongngo fingecma  
 bangec monnunac ngicngac, yeneac  
 ngictaungina amma garengyunuu yeneng  
 ye negensingema kecgcede.” *(Yesaia  
 11:10)*\*

<sup>13</sup> Anutungo kekecseriac dedepang faiec,  
 ye negensingegec yeac sogac sogai nga  
 ruae hafoangoc mewakengunubeso. Imoc  
 mewakengunuu Tiri Asungo nanggengunuu  
 kekecseriac dedepangngo ubanegen negengng-  
 inau sokongunubeso.

<sup>14</sup> Tosofocna, ngeni ngenaoc wiac gombunga  
 arenggegec nga negen negeng sasawa imocngo  
 mewakengunuu ngenaocngoc gorongina  
 naric kpeemegecde, fakangina ifia fede,  
 imoc negenseri yombonggeduae. <sup>15</sup> Ni ifi  
 negemma kengeha kpac kecma yoac goa  
 heigboringemmema ohoduae, imoc Anutungo  
 wosoefac nga kuc nenecac anduae. <sup>16</sup> Ifi amma  
 Yesu Kristoac kingangkpekpe kecma bangec  
 monnunac ngicngac botucnginau Anutuac kicfu  
 womonggareng kecma ua kpetiac mekecma yeac  
 siduc gombunggac ua mekecduae. Mekecba  
 Tiri Asungo bangeha bangeha ngicngac areng  
 tosea, yeni Anutuac sese dema kpetiac meyunuu  
 Anutungo yeneac negenu ngereede.

<sup>17</sup> Ni Anutuac kicfu kingang kpekpe uaya  
 mekecma Yesu Kristogoc kpeketahema kecduae,  
 imoc negemba engena yombong anu naric  
 deduae. <sup>18</sup> Kristongo dafiu kuc nenu neng

---

\* **15:12:** Isai imoc ngictau Davidiac mama.

bangec monnunac ngicngac yenearu kemma yeac yoac dema uaya meba yoara modacgec, imoc mi dekperagiyemmebaiu imocngo ebiribac. <sup>19</sup> Imoc Anutuac Asu yeac kucfu fingerec, yeac kucfaka hania hania morora hemma yoara modacgec. Ni siriha ifia Yerusarennu hanahema bangec noboc noboc mekengkecma Iririkong prowinsiu wisickeu Kristoac siduc gombang dekperagiyemmedarai.

<sup>20</sup> Amma amabangec goau Kristoac kpacsiduc bic negenggec, yenearu siduc gombang mong mi edeyunukefai, imocac negemba ngereede. Imoc yofiac, ngic mongngo wotung bic ukuec, imocac witiau ua mebadeac mi anende. <sup>21</sup> Imocac yoac bic oho ohoya fede,

“Yeac kpacsiduc mong mi dekperagiyemmegec, areng imoc yeneng hentegecgecde. Nga ngicngac kedzacnginango yeac kpacsiduc mi negenggec, yeneng imoc negentegecgecde.” *(Yesaia 52:15)*

<sup>22</sup> Imocac amma naso homac sinnau kpae fingeru ngenearu mi hayai. <sup>23</sup> Nga yofineng-gac uana bangec yomohai bic mesiba wisickeec. Amma ngenearu habadeac kifa homac songona bic anec. <sup>24</sup> Imocac Spania bangecfu kembade,† naso imohai ngenembeso negenduae. Amma ngenigoc ewacma songona imohai mesimaguc Spania bangecfu kembeso deba ngeneng ni mefic-nugecdeac negenduae.

<sup>25</sup> Nga naso yomohai ine Yerusarennu kemma kpetiac areng ihai kecdae, yeni memefiac

---

† **15:24:** Spania imoc Inglis yoacfu sing Spain.

wiac yemmebesonga anduae. <sup>26</sup> Kpetiac habu Yerusarennu kecdae, yenearunac goa makpekpea kecdae. Nga Makedonia nga Akaia habu yeneng yeneac ubamangang negemma memefic goa kpedzucnema faigecdeac degec. <sup>27</sup> Yeni ifi anggecdeac ayemmeec. Yerusarenggac kpebung yeneng Asuac wiac gombunga bangec monnunac ngicngac, yenearu mederema yemmegec bangec monnunac ngicngac, yeneac turunga anec. Imocac amma yeni yenang dzofinacngo meficgeyemmeude imocngo ngereede. <sup>28</sup> Ifi anu ubangerecnginaac fora imoc Yerusarennu mekemma yemmeba makpekpea yeneng imoc megecdeac singa meseribade. Imoc wisickeuguc ngenearu sing hama Spania bangecfu kembade. <sup>29</sup> Nga habade, naso imohai Kristoac kenec hafoangoc fede, imocgoc ngenearu habade, imoc negensiduae.

<sup>30</sup> Negen negensinggoc tosofocna, ngeni Kebunina Yesu Kristoac amma Asungo heresongogoc kekec meficgenemmeande, yec amma yofi edengunuduae, ngeni seriangoc meficnuma Anutu yofi numumibisia, <sup>31</sup> Yudaia bangecfu areng goa Kebu mi negensinggeandae, yeneac mariunac yeng ongonnuudeac numubisia. Amma ni memeficac wiac mehama kpetiac areng Yerusarennu kecdae, yeni imoc hengec ubangina ngereede, imocac momoc numubisia. <sup>32</sup> Ifi ammagec Anutungo negenu ngereeu ngenearu hama sogac sogaigoc tacnegembade.

<sup>33</sup> Anutu ruae minginango sasawa ngenigoc kecbeso, imoc fora.

## 16

<sup>1</sup> Ngactosonina Foibe, ye nanggema yoac goa deba negenggec. Ye Kengkereaiac kpebung kingang kpeyemmeande. <sup>2</sup> Ngeni Kebugoc kpeketahema ye hoanggema yeng wiac monggac obohou ngeni imoc meficgema mibisia. Ngeni kpetiac arenggac fakanina modacma ifi ammibisia. Ye ngicngac homac meficyunukecma ni ifingoc meficnuec.

<sup>3</sup> Prisika nga Akpira yeri nga ni, neni Yesu Kristogoc kpeketahema kecma ua nenahafoc meandimbe. Wenacngerecna yerearu faiba hade.

<sup>4</sup> Yereng neac amma kekecngira mi segereoc. Ni yerearu ubangerecna faiyecmeduae, imoc nengsac kpac. Bangec monnunac ngicngac, yeneac kpebung sasawa fekendae, yeneng ifingoc ubangerec deyecmedae. <sup>5</sup> Amma kpebung yereac amau kpeturanggeandae, yenearu ifingoc wenacngerecna faiba hade. Nga songo tosona Epaineto wenacngerecna ifingoc edebisia. Ye Asia bangecfunac Kristogoc kpeketahema yeac waracmedac anec. <sup>6</sup> Nga wenacngerecna Mariaaru sueba kende. Ye ngeneac amma uatoa mekefec. <sup>7</sup> Amma ngicngahocna neac bangec mocguna Androniko nga Yunia yerearu wenacngerecna faiba kende. Yeri aposoro botucnginau eweheiheigoc uangira mekecdape. Nga ni Kristoaru mi kpeketahebare yereng ye bic nengensinggeoc.

<sup>8</sup> Ni Kebugoc kpeketahema Ampiriato heresongogoc hoanggeduae, yearu wenacngerecna faiba kende. <sup>9</sup> Amma Urbanogoc Kristoac ua meing, yearu wenacngerecna nga songo

tosona Sitaki yerearu wenacngerecna faiba hau edeyurubisia.

<sup>10</sup> Nga Apere ye Kristoac ngic fora, yearu wenacngerecna sueba kende nga Aristoburoac arengfora yenearu wenacngerecna faiba hau edeyunubisia. <sup>11</sup> Nga Herodiong bangec mocguna amma Narikisoac arengfora Kebugoc kpeketahema kecdae, yenearu wenacngerecna sueba hau edeyunubisia. <sup>12</sup> Nga Kebuac ngac Tirifaina nga Tirifosa, yeri yeac ua mema kecdape. Amma tosongira Peresi ye yeac uatoa ifingoc mede nga ngicngac homacngo yeac heresongo negengkecdae. Wenacngerecna yenearu sueba hade. <sup>13</sup> Amma Rufu ye Kebuac meising ngic nga yeac nonggea momoc, yerearu wenacngerecna sueba hau edeyurubisia. Nonggeango ni ifingoc nonggo anende. <sup>14</sup> Amma Asingkrito nga Firegong amma Hereme nga Patoroba nga Herema amma negen negensinggoc tosofocnina goa yenigoc kecdae, yenearu wenacngerecna sueba hade. <sup>15</sup> Nga Firorogo nga Yuria amma Nereo nainagoc nga Orumpa amma yenigoc kpetiac areng sasawa kecdae, wenacngerecnango yenearu kende.

<sup>16</sup> Ngeni titikokoc kpetiac angemema wenacngerecngina angemebisia. Kristoac kpebung sasawa, yeneng wenacngerecngina faigec ngenearu hade.

<sup>17</sup> Tosofocna, goa yeni gurunendzic angandae, ngeni yeneac gareng meemebisia. Amma ngeni kpoukpouyoac bic megec, imoc memanganebauac wayunubisia. Imoc seriangoc dema edengunuduae. <sup>18</sup> Areng ifia yeni Kebunina Kristoac kingang ua mong mi kpekecdae.

Yeni ine yakaac songo nga negensongongina fingerudeac ngicngac goa negengisinga kpac tobangyunuma ubaherengina mesufuma yoac gombunga dema dekerec ayemmegecde.

<sup>19</sup> Nga ngeni enac tofoc tofoho areng kecdae, ngicngac sasawa yeneng imoc bic negenggecac negemba ngereede. Nga ngeni faka nga angammeme gombunga negentegecgecdeac amma angammeme manganaac arennu kopocsicngina kpac kecgecdeac anengande.

<sup>20</sup> Anutu, ye ruae mingina. Yeng naso mi hereemanu Satang haningina bageau memama kpedzameude. Kebunina Yesuac wosoefacngo ngenigoc febeso.

<sup>21</sup> Timoteo, neac ua mocgungo wenacngereha ngenearu sueu hade nga Rukio amma Yasong nga Sosipate bangec mocguna, yeni wenacngerecngina ngenearu ifingoc suegec hade.

<sup>22</sup> Ni Teatio, Kebutugoc kpeketahema kecma kibi yomoc ohoma ngenearu ubangerecna faiba hade.

<sup>23</sup> Gaio, ye ni nga kpebung sasawa ama heinemmeande, yeng geneac wenacngerec ifingoc faiu hade. Nga taonggac dzo gareng Erasto nga tosonina Kpato, yereng ifingoc ubangerecngira faiec hade.

<sup>24</sup> Kebunina Yesu Kristoac ruaengo sasawa ngenigoc febeso. Imoc Fora.

<sup>25</sup> Nenang sasawango Anutu kpackuneng minide. Ni Yesu Kristoac dekperagingemmema siduc gombung edengunuai. Anutungo imohainoc meseringunuu seria nanggecdeac yearu kuc ifia femide. Anu yoac imoc warac hanac hanaheaunacngoc sufuu sufuu feerekefec.

<sup>26</sup> Feerekefu bangec monnunac ngicngac sasawa, yeneng ye negensingema yoara modacgecdeac Anutu kekecseri minginango profete yeneac yoac mitikibiu fede, imocac deu yofinenggac didiu fingectegerec. Fingectegeru bangeha bangeha ngicngac areng tosea yeneng yoara naric negentegecgecde. <sup>27</sup> Anutu mocgungo negen negentegec mingina. Nga nenang Yesu Kristogoc kpeketahema dedengerec nga dedengerec Anutuaru faini fekengkecbeso, imoc fora.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023

19b7c48c-f4ce-5007-838d-58f01dc01ecc